

MONNA EA BITSITSOENG

SE-MOLIMO

 ...Neville. Ke masoabi ho le emisa, pel'a mabota. 'Me ke fetile mona taetsong e 'ngoe, nako e fetileng e ka bang hora le halofo, 'me batho ba se ba tloha monyako, ba tsamaea. Ka kopana le Billy ka ntle mono, 'me a re sebaka se ne se loketse ts'ebeletso ho ka qala, ha e sa le thapama ena. Ka baka leo, re ne re ts'oere kopano e nyenyane ena feela mona. Ha re a e phatlalatsa le dipampiring tsa selehae. Ka baka leo, re na le nakoana ya kopano ea setsoalle feela.

² 'Me jwale hangata ke lehlana-hlana, joale ka ha batho ba ka ntle ho motse ba tla tseba, hore, mona hae kamehla ke ho ts'ethema, ho matha ho tloha tulong ho ya tulong, le ho patissa. Ka baka leo, ke se ke batla ke e tloaela. Ke se ke fihla moo ke sa e dumelleng ho ntlhophia, kamoo ho ka khonahalang. 'Me le a tseba, u lokela ho sebelisa nakoana feela, 'me e loketse ho feta moo, ho Morena. Ha u sa etse joalo, joale ha u kene kopanong ka nchafalo ea Moya o Halalelang. 'Me ha u kena, joalo ka ho etsahetse kajeno, moo e ne e le bokhabane bo boholo, haholo, che, ka nako e 'ngoe ho boima ho 'na ho kena, ho ipoloka ho patisoeng ha nyenyane le ho sututsa, le a bona, 'me ke ipherekanye. Ha ke etsa hoo, joale ha ke khone ho fumana Moea o Halalelang kae kapa kae teng.

³ Ka baka leo, ke ikutloa ke soabile, le hona, ka batho ba emeng e—e pakeng tsa ditulo le ka mathoko. 'Me ba ee ba tle, ba nyarele, ba kene makoloing a bona ba ikele. Ke ne ke batlike ho fumana sekolo se phahameng tlase mona, ho ts'oara kopano ea masiu a 'Maloa feela, empa hajwale sekolo se a kena, 'me ho batla ho le thata ho 'na ho se fumana lekhatheng leo. Empa ke batla ho bolela ha ke ananela e mong le e mong oa lona ruri, ka hare le ka ntle, le ka ts'ebelisano ea lona e ntle, le ka sohle seo le se entseng.

⁴ 'Me hoseng hona, sekolong sa Sontaha, ke lebohile batho ka monehelo oo ke o filoeng bosius bo fetileng, e le monehelo oa boithaopo. Hantle, ke boleletse modisa mona, modisa oa rona ea ratoang, Moena Neville, le bao, nka rata ha ba sa etse hoo. Empa ba ho entse, leha ho le joalo, ka baka leo ke ne ke batlike ho e tlaleha. Joale, sena ke sebaka se se nyenyane, 'me ha se dule batho ba ka fetang makholo a mararo, ha ke nahane joalo. 'Me monehelo e ne e le didolara tse makholo a mararo le mashome a mabeli le metso e mene, ho bolelang palohare ea dolara motho ka mong. Ke monehelo o motte ka ho fetisisa oo nkileng ka o fuoa bophelong ba ka, bathong ba ba kaalo. Ka

tloaelo, o etsa palohare ea lisente tse mashome a mabeli le metso e mene motho ka mong, mashome a mabedi le metso e mehlano. Lisente tse mashome a mabeli le metso e supileng ke monehelo o moholo, mothong. Empa oona o entse palohare ea dolara mothong ka mong. 'Me ke ananela hoo ruri.

⁵ 'Me mohlomong, ha ke a kgona hoseng hona, ho hlalosetsa ba bang ba lona. Re fumane jeli, lebokose la jeli le beiloe hodim'a litepisi, le limphonyana tseo re li romeletsoeng. 'Na le mofumahali re lakatsa ho hlalosa liteboho tsa rona ho lona batho. 'Me kamoo re tsebang re tiile, tsohle li etselitsoe 'Muso oa Molimo.

⁶ 'Me hoo ho nketsa ke ikutloe eka nkabe ke e-na le sebaka se seholo moo re ne re ka tswela pele nako e telele le ho rerela batho. Empa esita le bosius bona, ka mora ts'ebeletso, ke lokela ho tsamaea. Etsoe, nka se khone ho tsamaea bosius bona, ha e se hoseng haholo, ho tsamaea.

⁷ Ke tla khutla bosiu ba Moqebelo o tlang. Ke tsamaee Sontaha hoseng, hape, ho ea Colorado. 'Me ke e 'ngoe feela ka morao ho e 'ngoe, ho tsamaea.

⁸ 'Me kopano ea ka e latelang ea mose ho maoatle e tla ka Pherekhong, e leng Australia le New Zealand, le ho haola mono. Joale, ke batla hore le nthapelle. Ruri ke labalabela dithapelo tsa lona.

⁹ 'Me joale ke batla ho...rona bohole re lebohe Molimo o Matlaohle, Ea re etseditseng lintho tse kholo hakana kopanong e nyenyane ena. Ke a kgoloa, hajoale, ho fihletsoe tse ngata kopanong ena ho feta kopanong efe feela eo nkileng ka e ts'oara bophelong ba ka tabernakeleng ena. Morena o bonahetse a bulletse mahlohonolo.

¹⁰ Ke hopotse, ha mohlomong, khabareng ea kopano ena, ho latela pono eo ke e boneng, ts'ebetso ea ka ea lentsoe e tla fetoleoa ts'ebetsong e 'ngoe e molemo e kholoanyane. Joale e tla etsoa ka ho tiea joale ka ha le utloetse ka lits'ebeletso tse ling tse tharo li leptjoa, kapa tse ling tsena tse peli. Ena e 'ngoe e tla hlaha joalo, e mpa e le kholoanyane. Empa bosius ba pele, ka na ka bitsetsa batho holimo mona aletareng, ho fetela temohong ea moea ka ho otloloha. Bosius ba bobeli, ka ba kenya phaposing, ho kena hantle temohong ea moea. 'Me masiu a mabeli a qetellang, joale, ra ba tlisa kalaneng mona, temohong ea moea ka kotloloho.

¹¹ Empa e le feela ho tlaleha lintho tse ling, moreri ea foulfetseng o n'a khutlisetsoe pono ea hae kalaneng.

¹² Le bananyana ba babeli, maobane bosiu, ba lutse setulong sa bakuli, ka maloetse ao ho seng motho ea tsebang e ne e le eng, ho se ngaka. Maoto a bona a le maholo, menoana e meholo ea maoto e khaoha, menoana e khaoha, 'me ho se letho le ka etsetsoang bona. 'Me eare Moea o sa tlotsa, ka tsamaela teng, 'me ka Lebitso

la Morena Jesu, ka rohaka lefu leo, 'me ke bao ba tsoa setulong se mabili. 'Me hoseng hona, ba tsamaea ka tabernakeleng mona, joale ka ngoana ofe feela, le ho tla kolobetsoa ka kolobetso ea Sekreste, hantle mona lets'eng, hoseng hona.

¹³ Eare ke sa lutse metsotsong e 'Maloa ke bala, nakoana e fetileng, 'me metsoalle e 'Maloa ea ka, Moena Hoover, moreri ea tsoang tlase Kentucky, a feta 'Me a siela mofumahali oa ka molaetsa, ho thoe bosiung ba maobane ha ho bitsoa mola, koana hara lets'ole, basali ba neng ba se na litlankana tsa ho rapelloa kapa letho, ba ne be lutse mono feela ba rapela. 'Me ha ba le mosali ea n'a sa ja, ke lebala nako e kae, lijo; mathopa ka maleng a hae, a tletse. Eaba Morena o a 'Mitsa le ho mo folisa. 'Me hoseng hona a tsoha 'Me a ja borakefese bo tloaelehileng, 'me bosiung bona o teng mona kae-kae.

¹⁴ A bua, le ka ba bang, mme, oh, nako e ka fela, ka lintho tseo Morena oa rona a li entseng. Ka baka leo, rona, re khothatsoa ke taba eo ea ho tseba ha e atametse feela, ntho e 'ngoe e kholo, e mothating oa ho etsahala.

¹⁵ Maobane mantsiboea, ka mor'a ts'ebeletso, ka mor'a Molaetsa, ha ke eso bone le ka mohla Moea o Halalelang o tlotsa batho haholo ho feta kamoo O entseng maobane bosiu. Re lebeletse ho hong, bosiung bona. 'Me joale le nthapelle.

¹⁶ 'Me ke batla ho bala Lentsoe le hlohonolofetseng la Molimo ho se hokae. 'Me pele re bala Lentsoe, a re bueng le Eena feela, ka lihloho tsa rona tse inamisitsoeng motsotso feela.

¹⁷ Ntate ea Ratehang ea Maholimong, re tla ho Uena phirimana ena, re batla re khathetse 'Meleng, empa, oh, ka moo meeaa ea rona e nchafetseng! Liponts'o tsa Molimo o phelang, ha A e-na le rona, le ho re hlohonolofatsa, le ho re fa see A se ts'episitseng, tse tlolisang, tse khaphatsehang, holim'a sohle seo re ka se etsang kapa ra se nahana. 'Me ha re bone mohau mahlong a Hao, ka ho lumela ho Mora oa Hao, Morena Jesu, re rata ho kopa phirimanaeng ena ho re hlohonolofatsa hape ka karolo tse peli tsa Moea oa Hao. O ke o ts'olleloe ka matla a maholo le ka litekanyo holima motho ka mong mona, ho lumela Evangelii le ho amohela Matla a Moea o Halalelang maphelong a bona. Pholosa ba ka pholosoang bosiung bona, Morena, 'me o folise ba itokiselitseng pholiso. Fana ka sena, Morena.

¹⁸ 'Me re sa bona batho ba hatellana ka hare, ba eme menyako, makholo a khutlisoa kerekeng e nyenyane, ho re hopotsa ha Jesu Kreste e sa le eena maobane, kajeno, le ka ho sa feleng. Ke ho re, mohla A n'a re etetse ka sebopetho sa nama mona, khatello e ne e le kholo hoo, ba sitiloeng ho tlisa motho ho Eena, ba lokela ho mo theola le marulelong a ntlo. 'Me rea rapela, Molimo, bosiung bona, e mong le e mong ea ileng a tlameha ho ipetetsa ka mokhoa oona a tle a putsoe joale ka monna eo.

¹⁹ Hlohonolofatsa Lentsoe la Hao re sa Le bala. 'Me E ke e be Lebone, Leseli tseleng ea rona. Hoba re e kopa ka Lebitso la Jesu. Amen.

²⁰ [Motho o bua le Moena Branham—Mong.] Che. Rosella Griffith? ["E."]

²¹ Ke sa tsoa bolelloa hona joale hore ngoanana eo ke ileng ka 'Mitsa hoseng hona... lekhoba la tahi le bitsitsoeng kopanong ea Chicago. O ne a lutse seotloana-moeeng ha Moea o Halalelang o no o bua le eena le ho bolela e ne e le lekhoba la tahi. Le lingaka tse kholo tsa Chicago li se li mo tetse. Ba Tlhokomelo Ea Matahoa ba se ba mo tetse. 'Me a bitsoa, ka HO RIALO MORENA. A folisoa. Ho tloha mohlang oo ha e-so nyoreloe seno.

²² Le mofumahali e mong ka holingoana ho eena seotlonamoeeng, e le motsoalle oa hae, ba phetseng 'Moho Calumet City. Ha motho a tseba seo e leng sona, ke meeli e mebe ho feta, Paris, France, ho etsoa lintho tse mpe tsa mefuta. 'Me a bolelloa hoba e ne e le morekisi oa lithethefatsi, 'me e le setants'i sa Fred Astaire. 'Me polelo ena ea hlabe hisa ntatae. A mpa a ema a re, "Ntate, monna eo o nepile hantle." O nyetsoe joale, mosetsana, 'me o leetong la hae, o tsoa le monna oa hae, ba bolela Evangel.

²³ Rosella o sebetsa boromuo, ho tsoa mosebetsing o mong le o mong oa chankana le nthong e 'ngoe le e 'ngoe a ka kenang ho eona, a bolella makhoba a tahi ts'epo e teng, 'me e ho Kreste.

²⁴ E sa le a e-na le moroalo bakeng sa ntatae; maoba mona, o n'a lutse puisanong ea metsotso e leshome, ea poraefete. Ngoanana eo e sa le a ts'ehetsa likopano ruri, lilemong tse 'ne kapa tse hlano tse fetileng. O mpoleletse, tlalehong ea metsotso e leshome, ka ntle koana tereilareng, puisanong, e itseng, "Moena Branham, ho sa tsotelehe u etsang, ke imetsoe bakeng sa ntate. O a u rata, o mpa a sa batle ho tla ho Kreste."

²⁵ Ka re, "Rosella, Molimo o tseba mokhoa oa ho sebetsa taba eo. O tseba mokhoa oa ho mo etsisa eona."

²⁶ 'Me joale ho fihlile litaba tsa hoba o katetsoe tlasa qubu ea majoe a laeme. A re mo rapelleng.

²⁷ Morena, ka polelo ea morali ea ts'epehang eo, o ts'oasehile tlase mono, a ka shoella tlasa eona; Molimo, a mpe a se ke, empa moea oa hae o ke o lelale 'Me o hopole hoba O Modimo Ea ka arabelang thapelo tlasa qubu ea majoe a laeme; joale ka ha U entse ka hara mpa ea lerusarua, kapa ka hara sebopi sa mollo, kapa lemeneng le ditau. U sa tse u ts'oana. Mo nts'e, Morena, e le Mokreste ea hlatsoitsoeng. Re a tseba lintho tsohle li sebetsa molemo ho ba U ratang. 'Me re rapela hore e tle e be e 'ngoe ea lintho tseo, re sa e bea ho Uena, ka Lebitso la Jesu. Amen.

²⁸ Palong ea Lentsoe bosius bona, Bukeng ea Marena a Bobeli, ke rata ho bala khaolong ea 2, bakeng sa mohlolithero o monyenyan, ho fumana thero, ha Morena a rata.

Mohla JEHOVA a tla nyolosetsa Elia leholimong ka sefejo, Elia le Elisha ba tloha Gilgale.

Elia a re ho Elisha, Ak'u sale mona, hobane JEHOVA o nthomile mane Bethel. Empa Elia a re, Ka JEHOVA ea utloang, le ka moea oa hao o utloang, nke ke ka u tlohela. Ba theohela Bethel.

Teng bara ba baporofeta ba Bethel ba tsoela ho Elisha, ba re ho eena, Ana ua tseba hobane JEHOVA o ea tlosa mong a hao ho uena kajeno? Eena a re, E, kea tseba; khutsang.

Elia a re ho eena, Elisha, Ak'u sale mona, hobane JEHOVA o nthomile Jeriko. Eena a re, Ka JEHOVA ea utloang, le ka moea oa hao o utloang, nke ke ka u tlohela. 'Me ba ea Jeriko.

Teng bara ba moporofeta...ba Jeriko ba re ho Elisha, Ana ua tseba hobane o ea tlosa mong a hao ho uena kajeno na? Eena a re, E, kea tseba; khutsang.

Elia a re ho eena, Ak'u sale mona, hobane JEHOVA o nthomile Jordane. Eena a re, ka JEHOVA ea utloang,...ka moea oa hao o utloang, nke ke ka u tlohela. 'Me ba tsamaea ba babeli.

²⁹ Morena a ekeletse mahlohonolo a Hae Lentsoeng la Hae. Sehlooho sa ka sa bosiu bona ke: *Monna Ea Bitsitsoeng Se-Molimo.*

³⁰ 'Me ke tla leka ho ba mokhuts'oane ka moo nka khonang feela, hobane re emetsoe ke mola o moholo oa ho rapela metsotsong e 'Maloa feela, empa, feela ho le bonts'a ha nyenyane mehla eo re phelang ho eona. Re utloa sello sena radiong, le libakeng tse fapaneng, homme se tsoa lipelong tse ts'epehang, "Morena, re romelle tsoseletso nakong ea rona." Le mangolong a tsoang ho Bakreste lefats'e ho pota, re utloa sello seo, 'me se tsosa ntho pelong ea motho. Sea susumetsa. Sea phahamisa. Sea phelisa, moea, ho utloa batho ba Morena ba batla tsoseletso. Ebile Molimo o entse ts'episo, "Ha batho ba bitsoang ka Lebitso la Ka ba kopana ba rapela, Ke tla utloa ke le Leholimong." 'Me ka baka leo rona, bosius bona, re batla ho nahana ntho eo. 'Me le hopole, hobane, hara sello sena sohle, Molimo o ke ke oa romela tsoseletso pele A hlophisa banna ba e thakholang. Re ke ke ra fumana tsoseletso pele re fumana banna; banna ba bitsitsoeng se-Molimo, banna ba koetlisitsoeng se-Molimo, ba sa koetlisoang likolong tsa thutamolimo le tsa thupello, empa banna ba khohlahetseng ba tumelo, bao Molimo o ba nts'itseng sekolong se khohlahetseng sa koetliso ea Hae. Banna ba sa ts'abeng ho tjamelana le mollo!

Banna ba kileng ba ema ka pel'a Sefahleho sa Molimo; 'Me ba tseba matla a Hae, ba tseba matlaohle a Hae, ba tseba matla a Hae a folisang! Banna ba itseng ba koetliselitsoeng ho tseba Molimo o phelang! Ke hantle ho ba koetlisa ka Lentsoe, empa, "Letere e a bolaea; Moea oa Phelisa."

³¹ 'Me pele re ka fumana tsoseletso ena, Molimo o loketse ho bitsa le ho koetlisa banna, banna ba koetlisitsoeng se-Molimo, ho jara Molaetsa oa Oona. 'Me ha ba tsotelle kemo-khahlano e ka hlahang. Ba ikanetse ho ea seboping sa mollo sa tlholo, kapa lemeneng la litau, kapa seo e ka bang sona feela. Ba ikanetse ho ea, hobane ba kile ba ema ka pel'a Sefahleho sa Molimo, 'me ba tseba hobane O teng. Leha e ka ba tlholo kapa phenyo, ba sa ema ka ho ts'oana. Ke koetliso ea mofuta oo eo Molimo a etsang ho batho. 'Me hoa makatsa ho nahana ha Molimo o ka etsa hoo, ha Molimo o koetlisa banna ba Oona joalo, empa O etsa joalo. Le a tseba, re na le sefela sa khale:

Ba bang hara metsi, ba bang hara meroallo,
Ba bang litekong tse boima, empa bohle ka
Mali.

³² Molimo o fetisa batho ba Hae hara liteko tse boima, ho ba hloekisa. 'Me ka nako e 'ngoe ho nka lilemo ho e fihlela. 'Me ho 'na, bosuong bona, kea lumela Molimo o koetlisa banna ba kang bao ho ema thekong e kapele, banna ba haolang, 'me, ka nako, ba hloibiloe ka maoto. Ka nako tse ling eke ho heleha ntho eohle, empa leha ho le joalo, hara tseo tsohle, ba tseba Molimo o phelang oo 'Me ba lebise lifahleho tsa bona pele, ba ntse ba tsoela pele.

³³ 'Me batho ba bangata ba rapellang tsoseletso, kea ipotsa ka nako tse ling, bao ba rapelang, na ha se lithapelo tsa bona tse katang liliba tsa mahlohonolo. Holim'a, e le bokoala 'Me ba ts'aba ho ts'epa Molimo, ba ts'aba ho Mo nka Lentsoeng la Hae, ba ts'aba ho lumela hore O sa phela kajeno, athe Bibele e bua e hlakile, e re, "E sa le eena maobane, kajeno, le ka ho sa feleng."

³⁴ Molimo ha o bitse, ke ka seoelo, banna ba masene, ba rutehileng, ba hlalefileng. Ba phetha karolo ea bona, 'me ke banna ba baholo. Empa ka tloaelo Molimo ha o batla ho phetha mosebetsi, O thola motho ea batlang a sa tsebe di-ABC tsa hae. Batlisisang Mangolo. Shebang lihistoring. Batho ba fihletseng letho ho Molimo e ne e se banna ba nang le lithuto tse kholo, empa banna, e bo, ba hlokang thuto, ba mpa ba e-na le takatso ea ho sebeletsa Molimo pelong tsa bona. A thola motho ea lemang, molisa, mots'oasi oa lihlapi, setsomi, ba neng ba phela tlahong. Khutsong eo le boimamelong ba tlhaho, teng Molimo o ka bua le bona. 'Me ke bona bao A na a ba bitsa.

³⁵ 'Me ha ba fumana hono, ha eba A bitsa mohlalefi ea phahameng, motho eo o qetella a khutletse mehopolong ea

bohlalefing ba hae. 'Me ka mora nakoana, ha lintho tse mohlo lo li etsoa, o tsoakane le batho ba lefats'e haholo, ho amohela tse joalo. Ha ho le joalo, pheletsong o qetella e le phutheho e hlophiloeng, 'me a tlohe a fotohe moreri. 'Me hoo ho itoketse, 'me ha ke na letho khahlano le motho ea ka etsang hono.

³⁶ Empa Molimo ha o le mothating oa ho etsa taba liemong tse ka holim'a hlaho, ka tloaelo O nka monna A ka beang ts'epo ea Hae ho eena, 'me a mo tlotse a mo rome, 'me ha a na ts'abo mosebetsing. Ke mofuta oa banna oo re o hlokang kajeno; e seng baithuti ba bents'itsoeng, empa banna ba tsebang Molimo Matleng a tsoho ea Hae.

³⁷ Ka motsotso, ho bile le monna Bibeleng, ea bitsoang Moshe, ea na thotse koetliso eohle ea hae. A tseba thutabomolimo eohle. A tseba ntho ka 'ngoe a na loketse ho e tseba. Esita leha a ne a hloka ho rutoa, a ka ruta baholo ba Iseraele, kapa ba Egepeta. A sa hloke letho. 'Me Bibele e re bolella a ne a rutiloe bohlale bohole ba Baegepeta. Khele, a ka ruta barutehi ba eona. A ka ruta boramahlale ba eona, lintho. Ka hlalefo, a bopetsoe botsekeng ka nepo. Empa, leha ho le joalo, ho nkile Molimo lilemo tse mashome a mane ho pola ntho eo ho eena, ka ntle mono mahlabatheng. 'Me hoba ho poloe hlalefo ea hae eohle ea menahano ea Molimo, ntle koana mahlabatheng, keha ts'epe e loketse ho boptjoa bocha.

³⁸ Ke kamoo Molimo o qotsang banna ba Oona o bo o pole ts'abo tsohle le hlalefo tsa bona tsohle, ebe moo 'Mopi e moholo oa Lipitsa a ba beang holim'a lebili 'Me a qalelle ho ba bopa bocha. Basebetsi, ba ts'oaneleheng! Ke monna oa Molimo. Ke mang ea ka koetlisang motho ho feta Molimo ka sebele sa Hae? Hlokomelang kamoo A ba koetlisang kateng.

³⁹ Re ka hopolang e mong, ea bitsoang Dafita. Molimo oa koetlisa Dafita e sa le moshanyana. Moporofeta Samuele a nyoloha a ts'ela oli hlohong ea hae, a mo tlotsa, hoba Molimo o no o tla koetlisetsa Dafita ho ba mohlabani oa senatla. 'Me le shebe koetliso A mo fetisitseng ho eona.

⁴⁰ Ke ne ke bala, nakoana e fetileng, holimo mona Leloaleng la Green, moo ke rapelang teng ka tloaelo, moo Molimo o itseng ho Dafita, "Ke u latile ka mor'a linku, u ntse u setse linku tse 'Maloa tseo tsa ntatao morao ka ntle koana, ka ba ka u etsetsa lebitso le kang la banna ba phahameng ba lefats'e."

⁴¹ 'Me ke hopola koetliso e khohlahetseng A fetisitseng Dafita ho eona. A se ke a mo kenya sekolo sa mofuta, A mpa a mo kenya sekolo sa Hae ka sebele. Dafita e ne e le setsomi le molisa. 'Me Lipesalemeng o ngotse ka makhulo a matala le metsi a khutsitseng, hoba a ne a le mong, boinots'ing ba hae. A sa silafatsoa ke lintho tsa lefats'e.

⁴² Molimo o loketse ho suthisa motho linthong tsa lefats'e, A tle a mo khutsise, a tle a utloe Molimo, Puo e khutsitseng eo, e

sesane. Joale, ha a se a hokahane le Molimo, o hloka ts'abo he. Lemohang hore ha a tsotelle se boleloang ke motho; o tsoa pel'a Sefahleho sa Molimo. O tseba Molimo Matleng a tsoho ea Hae.

⁴³ 'Me joale, Dafita, rea 'Mona. Ka tsatsi le leng, Molimo oa lumella bere ho kena eba e phamola nku ea hae. Dafita a sala bere eo morao. Ntle le pelaelo a nts'a rapela, hoba hamorao o bile a bua ka taba eo. 'Me a rapela a kopa Molimo. E le mohlokomeli oa nku eo. A ke ke a lahleheloa ke nku eo. 'Me o ts'oanetse ho pholosa nku eo, kahohle-hohle. Eaba o phamola letjeketjane la hae, a latella bere eo a e bolaea. O ts'oanetse ho pholosa nku eo. Le bona seo Molimo o no o mo koetlisetsa sona?

⁴⁴ Molimo o batla balisa ba Oona ba pholose manku, ho sa tsottelehe a ka lokela ho bitsolloa joang le seo a loketseng ho feta hara sona. Pholosa manku ao!

⁴⁵ A ntso hlokomela hoba Dafita o hlore bere ena, ha ho le joalo A phahamisa matla a phoofolo haholoanyane, 'me A romela konyana...tau 'Me ea nka konyana e 'ngoe.

⁴⁶ 'Me tau ke phoofolo e bohale. Oh, koana Afrika, mohla ke ne ke li tsoma...Tau e ka bolaea banna ba leshome le pele o ka re, "Jack Robinson." Oh, sebata se matla, sa se tonana! Ka mororohali feela, feela, banna ba timela. 'Me motho ea bolaoang ke matla a tau ha utloe bohloko ba letho. O nyarosa haholo, ho utloa mororo oo oa tau ha e rora. Lipitlahali tseo tsa maoto, ka motsotsaana feela, e se e harotse banna ba leshome le metso e 'Meli.

⁴⁷ 'Me ho nahana, ka moshanyana! Bibele e re o ne a le "mokhubetsoana." Ho bolelang e ne e le seeshana sa motho, a nkile letjeketjane. Lea tseba ntho eo ke eng, letlaloana le hokeletsoeng leratsoana lehlakoreng ka leng. 'Me tau e lapileng, e se e latsoitse mali molomong oa eona, ea kena e matha ea ba ea phamola nku. Dafita a lelala ho Molimo, a re, "Nke ke ka lahleheloa ke eona. U nthuse, Morena." A ntso rapalatsa tau, ka letjeketjane. Eare ha tau e mo tsohela matla, moshanyana eo, homme tau e le liponto tse ka bang makholo a mahlano, kapa ho feta, moshanyana eo ea boima ba mashome a supileng kapa a robedi. A rutla, leqhaameng la hae, thipa. Eare ha tau e tsoha, e ka bolaeang banna ba leshome e oahlela ha mmaloa, a e tlapurela ka mats'oala a ba a e bolaea.

⁴⁸ Sebete! Molimo ha o batle makoala. A ke ke a u sebelisa ha u ts'aba ho nka Lentsoe la Hae le ho lumela ho Eena. O batla banna ba khabane, ba sa tlo tsotella letho ntle le se boleloang ke Morena. Ke oona mofuta oo A loketseng ho tsamaea le ona. Ho tsottelehe kereke e reng, molisa o reng, kereke e emetse'ng; o emela Molimo le ho loka, le Lentsoe la Oona. Ke banna bao re...Molimo o tla ba romela matsatsing ana bakeng sa tsoseletso ea Oona eo batho ba Oona ba e rapellang.

⁴⁹ Ha isa-isa lilemong, mohla a ea kopana le banab'abo ntoeng, seqhobane sa mokaubere se seholo se le teng holimo mono, menoana ea li-inchi tse leshome le metso e mene. A bile a iphafa, a re, "Joale motho a ke a tlo ntoants'a. Ha a ka ntlhola, ke tla inehela; ka ho fapano, 'me re tla sebetsa." Ea inehelang, ehlile, etlaba eena ea hloloang.

⁵⁰ Ke ka moo Diabolosi a ratang ho e sebetsa kateng. Mohla a hopolang hoba u kokobelitse, o tla re ho uena, "U ke ke oa tsoella. U ke ke ua rera pholiso ea Khalalelo kerekeng ea Methodise, kerekeng ea Baptise." Che, lona bareri ba Methodise le ke le ts'oarane le Molimo hang, 'me le tla fumana hobane le ka khona kapa che. Uh-huh. Le ka sitoa ho e etsa ka thutamolimo ea lona eo ba e rutang. U tla lokela ho ts'oarana le Molimo 'Me u tsebe hoba O teng.

⁵¹ Ba re, "Batho ba Pentekosta." Lilengoaneng tse fetileng, sehlopha sa batho se ile sa ema sekutlong, ho se le—le ntlo eo ba kenelang ho eona. Empa na le balile makasine oa *Life*, ba itseng ka bona, tsatsi le leng? Ke mohlolo o hlollang ka ho feta mongoahakholo ona o kileng oa o tseba, ke ho hlahha ha kereke ea Pentekosta. Ruri. "Ebile ba hlahisa meeaa e mengata ho feta likereke tsohle selemong, li kopane." Ke se boletsoeng ke makasine oa *Life*. Hobane'ng? Mohlomong ba lubakane linthong tse ling, empa, moena, ke bahale; ba ema mono, ngatana-nngoe, ntho e nts'o ba e bitsa "nts'o" le e ts'oeu, "ts'oeu." Pheletsong mohla tsoseletso e ropohang, e tla ropoha hara bona. Le eme le shebe ha e ke ke ea etsa joalo. Ba tla otolloa, ka le leng la matsatsi ana.

⁵² 'Me, Dafita. Mohla Saule a mo apesang lihlomo tsa hae, a re, "Dafita, ha u loanats'a thaka lena, seqhobane..." Ho re, "Khele, u moshanyana feela, mocha feela, eena ebile mohlabani le bongoaneng ba hae. U ka mo loants'a joang?"

⁵³ Utloang Dafita e monyenyan enoa. Le a bona, ha a bua tjena, "Saule, motlotlehi, mong a ka. Ntate o n'a nkise mophatong oa melao ea puo, kholesheng, sekolong se phahameng. Ke ts'oere Ph.D. Ke—ke—ke hlometsoe ho etsa taba ena. Ke monna ea masene." Ha a e buoa joalo.

⁵⁴ O ile a re, "Moren'a ka," a re, "mohla ke alositseng manku a ntate koo, bere ea na ea kena ea phamola e le 'ngoe, eaba ke a e bolaea. Le tau ea kena ea nka e 'ngoe, ka e rapalatsa fats'e. Eare ha e tsoha, ka e bolaea." A ba a re, "Molimo o 'namoletseng linaleng tsa bere le tau, a ka 'namolella le matsohong a Mofilesta eo oa leqai." Monna ea koetlisitsoeng se-Molimo!

⁵⁵ Saule o na a eme mono ka koetliso eohle motho a ka e fumanang, ho tseba ho loana. Dafita a sa tsebe letho ka sabole. A sa tsebe letho ka thebe. Che, Saule a tloha a mo apesa lihlomo tsa hae tse kholo, 'me Dafita oa batho a batla a

solophana meomo. Ba fumana hore sehlako sa bokereke ha se lekane monna oa Molimo; sa mpa sa mo silakanya. 'Me litumelo tsa rona tsohle le lintho li ke ke tsa bapisoa le libetsa tsa Molimo mono.

⁵⁶ Oh, ka moo re ka tsoellang hoea-ho-ile, ra bua ka ba bangata, ngata ba fapaneng. Empa, ho toba mohlolithero oa rona, ho potlaka.

⁵⁷ Elia o na a tsofala, a tseba hore ho setse nakoana a be a siea lefats'e. 'Me Molimo oa fumana monna e le monna ea na ts'epahala, e le monna ea lokileng. A bitsoa Elisha. Joale, ha le ka elelloa, le leng la mabitso ao ke Elia 'Me le leng ke Elisha.

⁵⁸ Joale, a sa ka a its'unya libopehong, le linthong joalo, le ho tsoa 'Me a batla likolong tsa thutabomolimo, le likolong tse phahameng tsa lits'iu tseo. A etsa'ng? A tsoela masimong a ba a fumana monna a lema ka joko ea lipholo tse leshome le metso e 'Meli. Eng? Elisha, ea na lema, a tseba kamoo motho a ananelang mola o otlolohileng. A bile a tseba hoba ha a ka hetla a sheba morao, o tla tsoelipana a khelohe tsela. 'Me Molimo oa tseba hore monna ea tsebang kamoo ho phetholoang foro e otlolohileng, a tseba hore a ke ke a bea matsoho a hae mohomeng 'Me a hetla morao. A sa ka a ema ho fihlela a fumane thuto ea hae, ho tsoelipana tseleng. A mpa a hlaba pholo feela a hlahaha sehlabelo, a tloseletsa le Elia, hang feela ha kobo eo e ne e dula holim'a hae. A le malalaalaotsoe, a ikanne. Molimo oa tseba hobane O ka mo fa bokhoni.

⁵⁹ Joale, eka khona Molimo o mo koetlisoe nakoana. Eena, a se akoetlisitsoe ho tsepamisa mahlo a hae forong, ka joko ea lipholo tse leshome le metso e 'Meli, 'me monna a le mong a lema ka tsona. A mo ruta mamello e itseng, le mokhoa oa ho mamella, le ho koetlisa lipholo tseo ho tsamaea li otlolohile moleng.

⁶⁰ Ha isa-isa, a tlameha ho koetlisa banna ba 'Maloa; ho ba tsepamisa Bibeleng, Lentsoeng, ho tsepama le Molimo, ho lula moleng o otlolohileng.

⁶¹ 'Me, joale, esita le Molimo oa lokela ho mo kenya sekolo nakoana. A re, "Ak'u sale mona, hobane ke nyolohela teng-teng Gilgale. Morena o nthomile."

⁶² 'Me moporofeta, hoba a utloe Matla ao holim'a hae, kobo eo ea Elia, a re, "Ka Morena ea utloang, le ka moea oa hao o utloang, nke ke ka u tlohela."

⁶³ Ba ea Gilgale, e leng e-e nqalo ea boipolelo le kolobetso ea moKreste. A ntoo re, "Ak'u sale mona joale. Hona ho lekane. U ipoletse u bile u kolobelitsoe. Hona ho lekane. Ke ea Bethel," e leng ho re, "ntlo ea Molimo."

⁶⁴ Joale baipoleli ba bangata ba ka be khotsoe ke hoo. "Khele, ke sa tsoa kena kereke 'Me ke kene borapeling. Hore'ng u sa lule hona mona hantle?"

⁶⁵ Empa, utloang. Elisha a ke ke a hopola joalo. A se a utloile Matla a Molimo. A tseba o sa beetsoe ho fetisang. Ka hona a re, “Ka Morena ea utloang, le ka moea oa hao o utloang, nke ke ka u tlohela.” Khele, kamoo ke ratang hoo!

⁶⁶ Eaba o nyolohela Bethele, tlung ea Molimo, ’me teng a fumana sehlopha sa barutoana. Bareri ba koetlisitsoeng ka makhethe, ’me ba potela ba re ho eena, ho re, “Monghali, u a tseba ke’ng? U nts’ing tsa selomo. Na u tsebile hobane Elia o tla tlosoa ho uena? O sa tsorfetse haholo. A ke ke a phela halele. Elia o tla tlosoa, ’me u tla sala u eme mono joale ka lehlanya.”

⁶⁷ E re ke le boelle taba joale. Motho ea seng a latsoitse Molimo, a ke ke a rata, kapa, a ke ke a kholisa lenyora la hae lemeneng le chekiloeng ke motho. A ka se etse hono. Mono, thutamolimo eohle ea bona eo ba neng ba e-na le eona mono sekolong sa baporofeta, e ke ke ea kholisa lenyora la monna oa Molimo, ea seng a latsoitse Molimo.

⁶⁸ ’Me ba mo phehella ba sa phetse, “Khele, o loketse ho sala mona. ’Me, khele, livekeng tse ts’eletseng re ka u fa Ph.D. ’Me ua tseba kapele-pele ha u phethela koetliso ea lilemo tse ka bang ‘ne mona, re tla u fa lits’oanelo tsa ho rera. U a tseba, ha u ka ipaka u lokile, re tla u isa phuthehong ea rona e hlophiloeng.” Hoo ho ka se kholise monna oa Molimo. “Re tla u koetlisetsa boreri, ha u ka lula le rona feela lilemo tse ka bang ‘ne kapa hlano mona.”

⁶⁹ O n’a se na nako ea ntho ea mofuta oo. A le leetong la hae le eang Selibeng seo. O s’a n’a phahamele holim’ a ntho eo. O s’a n’a latsoe Leholimo moeeng oa hae.

⁷⁰ Eaba o re, “Na ua tseba hlooho ea hao e-ea tlosoa na?”

⁷¹ ’Me utloang seo a se buileng, “E, kea e tseba. Empa tholang.” Ka mantsoe a mang, “Tholang. Le se leke ho mpolella ka eona. Le se leke la mpolella seo ke se etsang. Ke tseba moo ke eang teng le seo ke se habileng.” [Moena Branham o opa liatla tsa hae hararo—Mong.]

⁷² Molimo, re fe banna ba kang bao, banna ba koetlisitsoeng se-Molimo ba sa tsebeng ho tsoelipana le *hona* ’Me ba kheloha ba tsoelipana le *hoane*.

⁷³ “Ke tseba moo ke eang teng. ’Me le se ke la mpolella eona. Ikhutsetseng. Le se leke la ntepeletsa, hoba ho ke ke ha thusa letho.”

⁷⁴ Oho, hola batho ba rapelloang ba ne ba ka fumana sebete se se kaalo!

⁷⁵ “Oho, matsatsi a mehlolo a fetile. Hoo e ne e se ‘nete. U shebe, u tlie ho kula hape.”

⁷⁶ “Thola. U se ke ua mpolella letho ka eona. Ke tsoela pele. Tsoseletso e a tla. Molimo o e ts’episitse.” Oho, lona bara ba Molimo, kenang selikalikoeng seno holimo mono, le sa ts’abe. Ts’abo e be sieo! Nkang Molimo Lentsoeng la Oona.

⁷⁷ “Kea tseba o—o tlil’o tlosoa. Empa ha se seo ke... Ha ho letho la lona mona le ka nkahlhang. Likhau tsa lona tsohle le li-Ph.D., le Bachelor of Art, le ntho ena eohle, ha e nkhollise. Tholang.”

“Che, u tla ngamoha hlooho holimo mono.”

⁷⁸ “Che, ha ke ngamoha hlooho, ke ngamohe. Ke kene leetong la ka.” A tsoelapele, a nna a tsoelapele.

“U ke ke ua khona ho e ts’elisa.”

⁷⁹ “Kea tseba ha ke khone ho e ts’elisa, empa Molimo o tla nts’elisa,” a rialo.

“Be, Elisha o ea Jordane.”

“Ke tsamaea le ‘ena.”

Molimo o batla Jordane bophelong bo bong le bo bong.

⁸⁰ Ha ho le joalo, Elisha a tla. A re, “Joale, Elisha...” Elia a re ho Elisha, “U sa le mohlankanyana feela,” mohlomong tjena, “ho bua ‘neta ha ua kena sekolo.” Moporofeta oa leqheku a leka ho ’Meha tekong. A re, “U sa le mohlankanyana feela. Ha ua kena sekolo hakaalo. Khele, ha u... Ebile, ho bua ‘neta, ha ua kena sekolo sa melao ea puo. Ntho eo u e tsebang feela ke ho lema. U k’u mp’u sale mona, mohlomong u ka thola Bachelor of Art ea hao. U a bona? U mp’u sale u fumane ligarata tsa hao.”

⁸¹ Empa e seng Elisha, e seng monna eo ea kileng a ama Molimo, a utloa Matla a tlolo holim’ a hae. O ile a re, “Ka Morena ea utloang, le ka moea oa hao o sa shoeng, ha nka ke ka u lesa.” A e-na le morero. O n’ a bone pono. O tseba se neng se tla etsahala.

⁸² Eaba ba theohela Jordane ba babeli. *Jordane* e bolela “lefu.” Ba ema mono, leqheku le mohlankanyana. Hoo ho bapisa Kreste le Kereke ea Hae ruri. Eaba ba eme mono, pel’ a Jordane. Ke eo moo e leng teng, e phorosela maralleng a Judea, maqhubuhali a hoba ka mokhoa oo. ’Me Elisha... moriri oa hae o moputsoa o lepeletse mokokotlong oa hae, le mahlo a hae a khale a sesefetseng a shebile khato e ‘ngoe le e ‘ngoe a e entseng. E mong, ke mohlankanyana, o ne a emetse pono, ho nts’elelsa thato ea Molimo pele. E mong a ea Hae. Babeli ba le Jordane. Elisha, ho eena... O ea Hae.

⁸³ Elia o n’ a bone bophelo ba mahlomola. Moreri eo oa mosali tlase mono a mo phelisitse ka thata, Jesebele le Akabe. Le ka majoe le ka lintho tsohle tseo a fetileng hara tsona! Elisha o n’ a khathala. ’Me a tseba o ne a loanne ntoa e molemo, a bile a qetile sebaka. Phomolo ea hae e le mose oane feela ho Jordane.

Empa Elisha o ne a shebile Moea oo o no o le holim’ a hae.

⁸⁴ Ha ho le joalo, ha o ka lemoha, molumeli e mong le e mong, ha u fihla sebakeng seo u lokelang ho rekisa, u tla utloa maqhubu a pholileng a Jordane a qaphana maotong a hao. Na u a ts’ela, kapa che? *Jordane* ke “karohano,” ho arohana.

⁸⁵ 'Me ka morao ho leralla ho n'o eme bareri bana, le joale, ba sa hoeletsa Elisha, "U mpe u se ke ua ts'ela, u tla fetella koana." Le ee le li utloe, lipuo tse joalo, le kajeno.

⁸⁶ Empa, Elisha a re, "Ha Molimo e le Molimo, 'me eo e le moporofeta oa Hae, ke loketse ho tlatsa sebaka sa hae. 'Me ke hloka Moea oa Hae ho e sebetsa. Ha ke hloke sekolo sa bona. Hola sekolo sa bona se ne se khonne ho e etsa, ba ka be tlatsa sebaka sa hae. Empa Molimo o mpilelitse ho e etsa, 'me ke hloka Moea oa Hae."

⁸⁷ Hola likolo tsa likereke li nkile sebaka, le Matla ao Jesu a faneng ka 'ona, ba ka be ba se nkile, lilemo-lemong tse ngata tse fetileng; Methodist, Baptist, Catholic, Presbeterian. Empa e ke ke ea e etsa le ka mohla.

⁸⁸ Ho batleha Moea oa Jesu Kreste! 'Me u tla ts'ela Jordane, ea phutheho e 'ngoe le e 'ngoe ea mokhatlo ka mora eona, ntho e 'ngoe le e 'ngoe esele, 'me u eme le Molimo feelsa.

⁸⁹ Ha ho le joalo, A ema le 'ena Jordane. Elisha a shebile holimo mane, a tseba, hore kae-kae mose oane, Molimo o tla kopana le 'ena. Eaba o hlobola kobo ea hae, 'me a retolohela ho mohlankanyana. 'Me a phutla Jordane. Hoba a etse, Jordane ea phetleha. Eaba ba tloha ba ts'ela, mobung o omileng.

⁹⁰ Le a bona, Jordane ha e mpe hakaalo, ebile, ha u e-na le Ntho e u bulelang tsela.

⁹¹ Khele, ha ba hata ka koana! Keha sehlahla ka seng se hoketsoe pere le koloi. Morena oa marena o ne a romile mofelehetsi ho tisa Elia Hae. Eaba ho felile, ho Elia. A se a khathalitsoe ke eona, lilemong tse ka bang mashome a robeli le ho hong, tsa ho pheha khang le batho bao tlase mono, 'me a fetile... ho feta hara littlala le lintoa, le nthong e 'ngoe le e 'ngoe esele. A itokiselitse ho ea Hae. Eaba o reteleha ho Elisha.

⁹² 'Me Elisha o ne a batla ho bona pono. Khele, a fetile likolong tsohle morao mono, tseo a ka beng a khefulitse ho tsona. Li ne li sa tsoe tema ea letho. Molimo o ne o tla mo koetlisa ka tsela ea Oona. Ka hona eare ha a sheba mono, a talima, lihlahleng tseo tsohle—tsohle keha ho hokeletsoe teng mono, makoloi ana a Mollo le lipere tsa Mollo, taba eo ea etsa ho hong ho Elisha. A bona pono. E, moena!

⁹³ 'Me eare ha Molimo o nyolla Elia, a khutla ka karolo tse peli tsa Moea oa hae. Keha a itokiselitse tsoselsetso.

⁹⁴ Lemohang monna eo ke mohlang oo, e le moshanyana ea lemang pele ho moo. Molimo oa etsa lebitso la hae le sa shoeng. Baporofeta bohole ba neng ba eme ka mathoko, ba mo shebile, keha ba lokela ho inama maotong a hae hoba a ne a fumane Matla a Molimo. [Moena Branham o kokota sefaleng hararo—Mong.]

⁹⁵ Hora e a tla eo Molimo o tla inamisa lefats'e maotong a banna le basali ba its'ohlomelitseng mono ba ts'ela Jordane, ba

arola ntho tseo...bobona, ba sutha linthong tsa lefats'e. Moena le khaitseli, bosiung bona, ekaba eng eo u e etsang, ekaba eng eo u e nahanang, ts'ela Jordane le Molimo. Ts'elela mose oane u be u ikhethe, siea lefats'e. Lumella Molimo ho u koetlisetsa mosebetsi oa Hae ka sebele. Re phela letsatsing le lelekkelang tsoseletso ena, empa Molimo o ntse a hlahloba, a leka ho fumana lipelo.

⁹⁶ Shebang. O n'a fumane monna ea bitsoang Pauluse, khele, Mofarasi ea ikahetseng serobe sa hae. Empa A tlameha ho mo sebetsa, joalo, pele e ka ba morutuo. Shebang see A se entseng, ho banna, mengoaheng eohle. O ne a loketse ho ba ts'oara a bululele thutabomolimo eohle ka ntle ho bona. 'Me Pauluse, hang hoba a bone pono, a se ke a ea Jerusalema, ho Gamaliele, moruti e moholo, e moholo ka ho fetisisa Israeleng, a n'a ithutile ho 'ena. Ha a ka a khutlela ho 'ena, ho kopa keletso ho 'ena. Khele, a se ke a ea Jerusalema, ka lilemo tse leshome le metso e mene. A mpa a theohela Egepeta, ts'ebeletsong ea thapelo. Teng Molimo oa mo ngolisa boholo ba Libuka tsa Testamente e Ncha. Le a bona? Molimo o tsomana le banna. A fumane monna eo A na batlile hore a ngole Testamente eo, ka hona A khetha Pauluse feela. 'Me a mo honya thutabomolimo ea hae eohle. 'Me Pauluse o boletse a n'a tlamehile ho lebala tsohle tseo a kileng a li tseba, ho ithuta Kreste.

⁹⁷ Kajeno Molimo o leka ho phophotha lefats'e ho rona, le ho re bea moo re ka iphophothang teng, 'me re be banna le basali ba ratang Molimo, homme ba tla lula le Molimo, 'me ba ts'ela mola o arolang, Jordane, A tle a khone ho re sebelisetsa khanya ea Hae.

⁹⁸ Ena ke hora eo ke batlang le nahane ka thata. 'Me ha u e-so ts'ele ngalo ena, ha o e-so ts'ele mola 'ona, moo o sa ntseng u re, "Che, 'me e ne e le setho sa kereke e itseng." Ho itoketse. Hoo ha ho nke sebaka sa hao. U a bona?

⁹⁹ Molimo o bitsetsa banna le basali, kajeno, lithekong tse ka pele tsa ntoa. Ha A ba biletse Gilgale, le joalo ha A ba biletse Jeriko, kapa Bethel. O a... Ba tla timela. O mpa a ba biletsha ho ts'ela Jordane, A tle a u kenyekolo sa Matla a Hae ka Sebele, le ho u bopa le ho u bopella.

¹⁰⁰ Bonang seo A se etsang hantle mona joale, ho romela Moea oa Mora oa Hae. O etsa liponts'o le meeka le mehlolo, eo lefats'e le e-so e bone lilemong tse likete tse peli tsa ho qetela. Lefats'e la mahlale le katlalitse sets'oants'o sa Eona, Topallo ea Mollo, Lengeloi la Morena. Se leketla Washington, D.C., bosiung bona, ka tlung ea bonono ba tsa selumeli, bona feela Boleng bo phahametseng tsa hlaho bo kileng ba pakoa ba katlatsoa sets'oants'o. O sa ntse a hlahisa eona mehlolo ea Hae e ts'oanang le meeka.

¹⁰¹ Ke eng? Ke ho ts'ela Jordane. Ho lula le Molimo boinots'ing. Le robale ka hara sebopi sa Hae se hloekisang. Ho

hloella lebiling le leholo la 'Mopi oa Lipitsa 'Me A ke a le bopelle. Bosiung bona, re sa lutse thapelang, re sa tla sebakeng seo, ithobatseng holima lebili la Hae, 'me le re, "Morena, ke 'na enoa. Mpope 'Me u mpopele sets'oants'ong sa Hao ka Sebele." 'Me Molimo o tla e etsa.

¹⁰² Joale, re sa inamisa lihlooho tsa rona motsotso bakeng sa polelo le thapelo. Pejana feela ho thapelo, ke rata ho botsa batho ba ka mona le ba ka ntle potso ena. Ke ba bakae ka mona bao ka bots'epehi ba ratang ho theohela Jordane le Jesu, bosiung bona, 'me teng u ts'ele ho fihlela u bona pono le ho bona seo Molimo o se leng sona ruri? Na le ka phahamisa matsoho a lona? Molimo a le hlohonolofatse. Shebang feela! Kea kholoa matsoho a makholo a mabeli ka mohahong, a phahame. Theohelang Jordane, e seng tlase kolesheng ea thuto. Elisha o ile a feta ntho eo mohoalotso.

Ba re, "Sala mona."

¹⁰³ A re, "Ha ke batle joalo. Ke ntho e entsoeng ke motho." Ah, e ke ke ea kholisa lenyora la motho ea nyoretsoeng Molimo. Boitsebelo ba thuto ea koleshe ha bo eo, ha ho—ha ho likhau tsa art, kapa ntho tse joalo, le khale, li ke ke tsa kholisa lenyora leo, pele u noa Selibeng seo sa Bophelo.

Lona ba phahamisitseng matsoho a lona, rapelang hammoho le 'na joale.

¹⁰⁴ Molimo o Ratehang, metsotsong e 'Maloa ena ea ts'ebeletso, banna le basali ba eme pel'a mabota, bashanyana le banana; le ka ntle, ba its'etlehile lifenstereng; ho a chesa. Empa leha ho le joalo ho na le se seng ka ho bona, ke hore O hapile maikutlo a bona, ho seng joalo ba ka be ba tlohile ba ikela. Ba ne ba sa tl'o ema mono ka tsela eo.

¹⁰⁵ Morena Molimo, hoba ba tseba ke batho feela. 'Me re balile lipampiring moo e mong oa boramotse ba rona ba mehleng ba tlottlehang a n'a mametse Motlatsa-Mopresidente a bua, a ileng a nkuoa. E mong papaling ea bolo, phirima e 'ngoe, monna ea tumileng, a ikela ka potlako. 'Me meeaa ea bona e sebakeng se seng phirimaneng. Molimo, eo e tla ba tsela ea rona ka tsatsi le leng. Mohlomong e seng ka mokhoa o ts'oanang, empa re ts'oanetse ho tsamaea.

¹⁰⁶ 'Me batho ba ke ba phaphame 'Me ba lemohe hore ho ba setho sa kereke ha se seo O se batlang. O batla batho ba tlatsoe ka Moea, ba tsoaloe, ba rengoe, ho chesoa ka hare ke Moea o Halalelang, ba ts'oailoeng, banna ba ts'etseng mola, banna ba bitsitsoeng se-Molimo. 'Me re lumela hore O tla romela tsoseletso eo Billy Graham le ba bang ba bangata ba e rapellang. Mohla O khonang ho hulela banna boinots'ing ba bona, hole le likolo tsa thuto ea bolumeli, hole lemekhoa ea bona ea boits'epo, banna ba se nang ts'abo, banna ba—ba nang le semelo ba tsamaeang le Uena, ba O lumelang 'Me ba O nka Lentsoeng la Hao.

¹⁰⁷ Molimo, bongata ba bona ba eme mona joale, ba tle ba fe Morena Jesu tsohole tseo ba nang le tsona, ba rekise lefats'e, ba tlohe ba fete Gilgale, sebaka sa boipolelo le qalo ea Mokreste. Ho tsamaea a feta mohoalotso sekolong sa baporofeta se neng se hahiloe mots'eo mono ka thutabomolimo ea bona. Ho tsoelapele ho ea Jordane, ponong e pepeneneng mohla ba tla ts'ela, ho fumana Molimo ea phelang a ntse a phela.

¹⁰⁸ Hamorao re fumana moporofeta a qamaka ka mathoko ho 'ena, 'me Mangeloi ao a Mollo a eme mono, le makoloi, tlase Dothane, tsatsi le leng.

¹⁰⁹ Ba sa le teng mona phirimaneng ena, Morena. Bitsa banna ba Hao, bitsa basali ba Hao, bashanyana ba Hao, banana ba Hao, Morena. Bolela khotso lipelong tsa bona 'Me u ba lumelle ho ts'elela ka nqane ho lintho tsa lefats'e. Hoba re e kopa Lebitsong la Jesu le bakeng sa Hae. Amen.

¹¹⁰ Ke batla ho bina nakoana feela, ka boimamelo feela tlottlisong.

Thato ke a Hao, Morena!
 Thato ke a Hao!
 Laola ka botlalo
 Bothong ba me!
 Nts'oare u mpope
 Thatong ea Hao,
 Ke sa letile,
 Khutsong le boineelong.

Hammoho joale, mokgoeng oa tlottliso.

Thato ke a Hao,
 Joale u ineele thokong eo, ka thoko eo, ho Molimo.

Thato ke a Hao,
 Laola ka botlalo
 Bothong ba me!
 Nts'oare u mpope
 Thatong ea Hao,
 Ke sa letile,
 Khutsong le boineelong.

¹¹¹ Ka boimamelo joale, tlottlisong joale. Le se ke la qamaka. Shebang ho Molimo feela.

Thato ke a Hao, (Ka ho shoerella ruri.)
 Thato ke a Hao!
 Uena o 'Mopi;
 'Na ke letsopa.
 Nts'oare u mpope
 Thatong ea Hao,
 Ke sa letile,
 Khutsong le boineelong.

¹¹² Ke lumela ho tla ba molemo ruri. Le rata ho tlotsisa? [Phutheho e re, “Amen.”—Mong.] Molaetsa o fetile joale. A re tlotsiseng feela, motsotso, ka lihlooho tse rona tse inamisitsoeng, thokong eo hape.

Thato ke a Hao . . .
 Thato ke a Hao!
 Ke Uena 'Mopi;
 'Na ke letsopa,
 Nts'oare u mpoope
 Thatong ea Hao,
 Ke sa letile,
 Khutsong le boineelong.

¹¹³ Morena, fana ka sena. E mong le e mong, ho tloha baneng ba banyenyane bana ho fihlela leqhekung la monna le mosali ea ka pel'a Sefahleho se Khetehileng, Moea o Halalelang hona joale o ke o sebetse tumelong ea bona le ho tlosa lepelaelo tsohle, ho hholeha ho sa tsebisahaleng hohle, 'me ba ke ba boptjoe ho latela thato ea Hao. Ba sa lutse lebiling la Hao le leholo le bopang, re bea meea ea rona ka boineelo, ho boptjoe bocha. Fana ka sena, Oho Molimo, ka Lebitso la Jesu Kreste, Mora oa Hao. Amen.

¹¹⁴ Ke rata hona feela. Lona? [Phutheho e re, “Amen.”—Mong.] Ho utloa Moea o Halalelang ka boimamelo. Oh, ka mora Molaetsa o khohlahetseng, ho ntano latela monate oo oa Moea o Halalelang! O tlisoa ke Lentsoe. Ke tla bina temana ea sefela seo, kapa ke e leke.

E fopha mali, e, E fopha mali,
 Evangel ena ea Moea o Halalelang, E fopha
 mali,
 Mali a barutuo ba shoetseng 'Nete,
 Evangel ena ea Moea o Halalelang, E fopha
 mali.

Oa pele ho shoa leanong lena la Moea o
 Halalelang,
 Ebile Johanne Mokolobetsi, empa a shoa sa
 monna;
 Ha nto tla Morena Jesu, ba Mo thakhisa,
 A bolela ha Moea o tla pholosa batho sebeng.

Ha hlaha Petrose le Paulo, le Johanne ea
 ratoang,
 Ba neela maphelo a bona Evangel ena e tl'e
 phatsime;
 Ba tsoaka mali a bona, sek a baporofeta ba
 khale,
 Ho tl'o boleloe ka botsepehi 'Ntsoe la 'Nete la
 Molimo.

Ba nto tlepetsa Setefane, a rera khahlano le
sebe,

A ba halefisa hona, ba bothetsa hlöhoo ea hae;

A mpa a shoa Moeeng, a neela moea,

A ea kopana le ba bang, lekhotla lela le
fanang ka bophelo.

Meea tlasa aletare, e a hoa, “Ho fihla neng?”

Morena a tla ahlola neng ba entseng bokhopo;

Empa ba bang ba sa tla neela mali a ‘phelo ba
bona

Bakeng sa Evangel ena le leqhubu la Eona le
le fubelu.

Hammoho joale.

E fopha mali, e, E fopha mali,

Evangel ena ea Moea o Halalelang, E fopha
mali,

Mali a barutuo ba shoetseng ‘Nete,

Evangel ena ea Moea o Halalelang, E fopha
mali.

¹¹⁵ E ne e le bomang? Banna bao Molimo o ba koetlisitseng oa
ba oa ba bitsa. [Sekheo lebanteng—Mong.] Molimo a ka sebelisa
lekoala joang ho kenya Lentsoe la Hae? O a thothomela. Ke lona
lebaka leo ba sa tsebeng letho ka Lona. Banna ba sa
thothomeleng, bao Molimo o ba bololitseng ka Moea o
Halalelang, Molimo o phela ka hare. A ka tiisa ka mali a hae ka
potlako eka ha e, bopaki ba hae ka mali a hae; ha a tsotelle. O
phela ka Kreste. “Ho ‘na ho phela ke Kreste, ‘me ho shoa ke
moruo.” Ke kamoo ba ne ba ikutloa kateng ka eona. Amen.

¹¹⁶ Joale ke nako ea mola oa ho rapella. ’Me ke mola o tileng
ka nako oa thapelo, e ka ba mashome a mabeli ka morao ho
robeli. Empa re batla ho rapella batho. ’Me ke batla lona hona
joale, hona... Thero eohle eo re neng re ka e rera e ne e sa tl’o
bapisoa le Lentsoe le le leng le builoeng le tsoang ho Molimo
ka Sebele.

¹¹⁷ Joale ho qala mola oa ho rapella, etsoe, re ts’episitse ho
rapella bohole. Re tla etsa joalo, ha Morena a rata. Rona,
bosiung bo bong le bo bong, ho nts’itsoe litlankana tsa ho
rapelloa. Le ho bolela, tabeng ena, ho re... Re tla bitsa
sehlopha mono bosiuung bo bong le bo bong, mokhoeng oa
temoho ea meeaa. Empa batho, he, ba bang ba bona ba ne ba
tsamaea bosiu boo. Re ne re ts’oara ts’ebuletso e kholo, ’me
Moea o Halalela o ts’olohe, le batho ba tsamaee. ’Me bosiuung
bo latelang re tlamehe ho nts’ a tse ling hape.

¹¹⁸ Ebile ha ke sa fanye, na ha ke a sheba Fannie Wilson ea
emeng morao mane? [Khaitseli Wilson, “Ke hantle.”—Mong.]
Ke hopola mohla ke ne ke nka mosali eo, ekaba leshome le
metso e supileng... Oho, ho feta moo, ekaba mashome a

mabeli . . . [“1932.”] 1932, a bolaoa, ke TB, ‘me ngaka ea motse ‘ona e se e mo tetse. ’Me mothapo oa hae oa mali o khaohile hoo likobo le ntho e ‘ngoe le e’ngoe li ne li tletse mali. Monna oa hae le morali ba tla mpitsa, hosseng ho hong. Ke nyolohela mono ka bitsa Lebitso la Morena Jesu Kreste, holim’ a hae. ’Matsatsi a ’Maloa hamorao, hara mariha a batang, ka mo kolobetsa ka Lebitso la Morena Jesu Kreste, nokeng. Eaba o theoha ka tsela, ka morao ho lori ea khale ea likhomo, a kolobile tee-tee. Le phirimaneng ena o sa phela, hoba Kreste o entse hoo. Ke khetlo la pele ke ’Mona ka mora lilemo tse ngata. Ha ke sheba holim’ a mokhupi, ke e bona.

¹¹⁹ Molimo o sa phela. Ke hantle. ’Me O boletse, “Ka hoba Ke phela, le lona le ka phela ke hona.”

¹²⁰ Joale ke rata, ka mokhoa o itseng ho le tlalehela seo taba ena e leng eona, hobane, ha ke sa etse, le ka ts’oana le tloha le re, “Che, ha ke e utloisitse.”

¹²¹ Joale, liphehello tsa ka ke tsena, ho re, “Jesu Kreste e sa le eena maobane, kajeno, le ka ho sa feleng.” Joale, ha esale Eena, eka khona A ts’oane molaong o mong le o mong, matla a—a ts’oanang, boholo bo ts’oanang, ho ts’oana nthong e ‘ngoe le e ‘ngoe A ne a le eona.

¹²² ’Me lefats’eng mona, ho kile ha hlaha Bagerike ba bang, ka mohla, ba tiliheng ba re, “Bengali, re batla ho bona Jesu.”

¹²³ ’Me ke lumela eo e le takatso ea monna e mong le e mong kapa mosali ea utloileng tsa Jesu, o batla ho ’Mona. ’Me ha A sa ts’oane, re ke ke ra ’Mona. Empa ha A ts’oana re ka ’Mona, ho seng joalo O buile ntho e fosahetseng. “Ho se ho se hokae, ‘me lefats’e ha le sa tla ’Mpona, empa lona le tla ’Mpona, hoba ‘Na,” leemeli la motho, “Ke tla ba le lona, le ka ho lona ho isa pheletsong ea mongoaha.” Eaba Jesu o ts’episa ho lula ka hara Kereke ea Hae, A etsa lintho tseo A li entseng mohlang oo, ho fihlela mongoaha o ba o fela. Joale O boletse, “Ho se ho se hokae,” lefats’e ha le sa tla ’Mona. Che, joale, re tla ’Mona joang? Re tla lokela ho bona Moea oa Hae, haeba A le ka ho rona, ‘me Moea oo o tla lokela ho sebetsa kamoo A sebelitseng mohlang oo, ho seng joalo E tla be e se Moea o le mong.

¹²⁴ “Ke ‘Na sefate sa Morara, lona le makala.” Ha re bea . . . Lekala ha le lutse Morareng, lekala leo le tla bea tholoana ea mofuta o hlahisoang ke Morara ho lona. Che, Morara oa pele o tlie . . . Lekala la pele le hlahileng Morareng e ne e le lekala la pentekosta; lipono, matla, lipholiso, kolobetsa ea Moea o Halalelang, liponts’o tse kholo, le meeka. Lekala le latelang eka khona ebe lekala la mofuta o ts’oanang. Ho fihlela qetellong, eka khona ho ts’oane. Ke seo Jesu a se boletseng.

¹²⁵ Joale, a re shebeng seo A n’ a le sona maobane. Ha re ka fumana seo A n’ a le sona maobane . . . Joale kea khaoletsa, ka baka la nako; ke tla fana ka litaelo tsa metsotso e mehlano. ’Me

ha re ka bona seo A n'a le sona maobane, eba joale re ka bona seo A leng sona kajeno, 'me e tla be e sa le joalo ka ho sa feleng. Ana taba eo e ts'epahala ka ho lekana? [Phutheho e re, "Amen."—Mong.]

¹²⁶ Joale, mohla A n'a le lefats'eng mona, O tlie joale ka Messia, ho kolobetsoa ke Johanne Mokolobetsi; a e-so sebetse lekhatheng lena. Eaba O kena thutong ea Hae ea ho qala. O ne a rometsoe ho mang? Bajuda.

¹²⁷ Joale, re a hlokomela ho na le lichaba tse tharo feela tsa batho lefats'eng, tseo ke: Mojode, Molichaba, le Mosamaria; e leng Kama, Sema, le sechaba sa Jafeta. Mojode, Molichaba, le Samaria.

¹²⁸ Le sa hopola? Petrose o ile a ba hlabela mokhosi, a ts'oere linotlolo tsa 'Muso, ka Tsatsi la Pentekosta, ho Bajude. "Bakang, e mong le e mong oa lona, 'me le kolobetsoe ka Lebitso la Jesu Kreste."

¹²⁹ Filippi a theoha a rerela Basamaria. Bohle ba lumela ba baka, 'me ba ne ba kolobelitsoe ka Lebitso la Jesu Kreste. Feela, Moea o Halalelang o e-so theohele holim'a bona. Petrose o ne a ts'oere linotlolo. A theoha a ba Bea matsoho, eaba ba amohela Moea o Halalelang.

¹³⁰ Eaba Kornele, Molichaba, hoba a bone pono, hore o n'a loketse ho lata monna ea bitsoang Petrose, Simone Petrose, ea lulang tlung ea monna ea suhang matlalo. Eitse ha Petrose a nyolohela mono, "Eare Petrose a sa bolela Mantsoe ana, Moea o Halalelang oa theohela holim'a bona." Petrose a nto re, "Ke mang ea ka hanang le metsi? Ha e le moo batho bana ba amohetse Moea o Halalelang joale ka le rona re O amohetse ts'imolohong." Lekala le leng le le leng le hlaha le ts'oana. Le a bona?

¹³¹ Joale, eare ha Jesu a kopana...Joale, O ne a sa tlela Balichaba. Ke ba bakae ba tsebang hoo? O ile a thibela barutuo ba Hae ho ea ho Molicha ofe kapa ofe. Ke ba bake ba tsebang? "Le se ke la ea ho Balichaba, le mpe le ee linkung tsa Israele tse lahlehileng. 'Me ere le sa ea, le rere, le ntse le re, 'muso oa Leholimo o atametse,' linkung tsa Israele tse lahlehileng."

¹³² Joale, O n'a lebeletsoe ke mang ho tla tsatsing leo? E seng Balichaba; re ne re le bahetene, ma-Anglo-Saxon. Re le Maroma, re rapela letsatsi le ntho tse joalo. Re sa lebella Messia oa letho, haese Bajude le Basamaria. Joale, O Itsebisitse batho ba neng ba Mo shebeletse joang?

¹³³ A re khutleng morao ho Mohalaleli Johanne, khaolo ea pele, motsotsa feela joale. 'Me le mamele ka hlokomelo.

¹³⁴ Mojude oa pele ea kileng a tlisoa ho Eena, mohla Filippi kapa...Andrease a n'a sokoloha, a bile a tloha a ea lata

moena'e, Simone Petrose, o ile a tlisa Simone pel'a Jesu. 'Me Jesu a 'Molella lebitso la hae e ne e le mang, le hore ntatae e ne e le mang. Ke ba bakae ba tsebang hoo? [Phutheho e re, "Amen."—Mong.] Le hopola hore taba eo e ile ea etsang ho monna eo, eo hamorao a n'a tla ts'oara linotlolo tsa 'Muso letsohong la hae? Ke seo A Ipakileng a le sona, Messia. Ka potlako he...

¹³⁵ Filippi o ile a sokoloha, a tloha a lata Nathanaele. Ke limaele tse mashome a mararo ka morao ho thaba. A ntoo ea tlung, 'me ke mo utloa a re, "Oho, Mof. Nathanaele, Nathanaele o kae?"

"Oho, o ka ntle hara—ka hara ts'imo ea mehloaare."

¹³⁶ A mathela teng ka potlako, "Nathanaele, u hokae?" Eaba o mo fumana tlasa sefate. 'Me Nathanaele a ntse a rapela. A mo emela ho qetella ho rapela. 'Me a re, e seng, "U phela joang, Nathanaele? Lijalo li ea joang?" Khele, o n'a ts'oere Molaetsa! Ke kamoo monna ea kopaneng le Jesu a leng kateng. A se na nako ea bosaoana. A re, "Tloo, u bone Eo re mo fumaneng, Jesu oa Nazaretha, mora Josefa!"

¹³⁷ 'Me joale ke bona Nathanaele a hlochlora liaparo tsa hae, a ema thapelang. A re, "Joale, Filippi, ke u tsebile u le monna ea molemo, le monna ea ts'epehang. Joale, na ntho e molemo e ka tsoa Nazaretha? Che, u a tseba, ha Messia a ka tla, O n'a tla tla Jerusalema, ka kereke." Ke seo batho ba bangata ba se nahanang kajeno. Le a bona? "O ne a tla tsoa Jerusalema. Kaiafa ha a e tsebisa sebokeng se fetileng. Ka baka leo, ha ho moithuti oa thutabomolimo ea ileng a tsebisa taba eo. Ke u tsebile u le monna ea ts'epehang. Na u se u kenoa ke maphokaetsi?"

"Oho, lekhale. Tloo u iphumanele."

A re, "Na ntho e molemo..."

¹³⁸ A mo araba ka karabo e ntle ka ho fetisisa eo motho a ka e buang, a re, "Tloo, u iponele."

¹³⁹ Joale, tseleng e potelang, ke utloa Nathanaele a re... kapa Filippi a re ho Nathanaele, "O a tseba ke eng? O sa mo hopola mots'oasi eo oa khale oa lihlapi tlase mono eena ea n'a sa khone le ho saena rasiti mohla u ne u mo fa eona, u reka hlapi ho eena?"

"E. Kea kholoa lebitso la hae e ne e le Simone."

"E, ho joalo."

¹⁴⁰ "Ke ile ka mo tlisa, tsatsi le leng, pel'a Messia eo, 'me hang feela ha A 'Mona, A re, 'Lebitso la Hao u Simone. Lebitso la ntatao ke Jonase. 'Me ke... Nke ke ka makala, empa ha u fihla ka pel'a Hae, A ke ke a u bolella hore u ne u le mang."

A re, "Ah, joale, be butle, e seng 'na."

¹⁴¹ Ha ho le joalo, ba fihla tsatsi le hlahlamang. 'Me Jesu a le moleng oa ho rapella, ka tloaelo, a rapella bakuli. 'Me eare ha a khonne...a nyoloha 'Me a kena lets'oeleng. Jesu a sheba holimo, eaba O bona Filippi a tla, a tlisa motho a tsamaea ka mola. Eaba O a mo talima, 'me A re, "Bonang, moIseraele eo ho seng mano ho eena."

¹⁴² Na ke Thuto esele eo? E ne e le Jesu, maobane. Ke Jesu, kajeno, ha eba E sa le 'ena.

¹⁴³ Eaba monna eo o a ema. Eka ke bona Nathanaele. Filippi a mo khotla, a re, "Ke itseng ho uena? Ke itseng ho uena?"

¹⁴⁴ A re, "Rabbi," ke ho re *moruti*, kapa kamoo re ka e bitsang kajeno, le a tseba. Hantle-ntle, lentsoe le nepileng la Seheberu, le bolela *moruti*. Ho re, "Rabbi, U mpone neneng? Ho tla kang ha U tseba letho ka 'na? Ha ke eso U bone bophelong ba ka. U tseba joang hoba ke Moiseraele? U tseba joang hoba ke molemo, ke a ts'epahala, ke na le 'nete? Ha U e-so mpone, bophelong ba Hao. U ntsebella kae?"

¹⁴⁵ A re, "Pele Filippi a u bitsa, u sa le tlasa sefate, Ke u bone," limaele tse mashome a mararo ka mora' thaba, letsatsi pele ho moo. Mahlo a makakang!

¹⁴⁶ Joale o ile a reng? A re, "Rabbi, U Mora Molimo. U Morena oa Iseraele." Ekare ha Bajude ba eleletsoe hoo...Joale be butleng. Eo e ne e le Mojude ea khethiloeng. Ke ba bakae ba lumelang khethong? Khele, ho na le batho ba bangata ba sa tlo e amohela. Le a bona? Bibele e boletse joalo. Empa monna eo o ne a e-na le Moea oa Molimo ka ho 'ena. Eaba o a e paka, a re, "Rabbi, U Mora Molimo. U Morena oa Iseraele."

¹⁴⁷ Empa litsebi tsa tsatsi leo tsa thutabomolimo keha li eme mono, baptista le baruti ba baholo, ba Mo mametse. 'Me lea tseba ba its'eng? Ba re, "Ke senohe-ramahlohonolo. Moea oa Belsebule o lutse holim'a Hae." Jesu...Ha ba ka ba e bua, ba hoelelitse. Che, che.

¹⁴⁸ Empa Jesu a reteleha a ba sheba. A re, "Le ka Mpitsa joalo la phonyoha. Empa nako e a tla mohla Moea o Halalelang mohla a fihlang, ha le ka bua lentsoe le le leng khahlano le Eena ha a etsa ntho e ts'oanang, e ke ke ea ts'oareloa lefats'eng lena kapa lefats'eng le tlang."

¹⁴⁹ Ha ho le joalo re ts'oarane le eng? Bao e ne e le Bajude. Bajude ba makoma-'nete le ba ts'epehang ba ne ba lumela ho Eena e le Messia.

¹⁵⁰ Baruti le litsebi tsa thutabomolimo, e ne e le bomang? Peo ea noha, joale ka ha re fetile teng. O ile a re, "Le bana ba ntata lona, Diabolosi." Leha ho le joalo, ba le masene, ba hlalefile, banna ba halalelang. Ba sa thonake lehlokoana...Khalalelo. Ba sa batle ho tlola Sabbathha. Ba ke ke ba ja nama ea letho. Ba halalela, empa ba sitoa ho e bona. Le a bona, ba ne ba koetlisitsoe ke motho.

Molimo o koetlisa banna ba Hae, ba khohlahetseng. Ke hantle. Banna ba bitsitsoeng se-Molimo!

¹⁵¹ Eaba tsatsi le leng O—O ne a . . . Ke seo Bajude ba ne ba se nahana. Ke kamoo A Itsebahalitseng ho Bajude. Ke ba bakae ba tsebang hoba leo ke Lengolo? [Phutheho e re, “Amen.”—Mong.] Ke hantle. Joale, haeba A Itsebahalitse ho Bajude, e ne e le Jesu maobane le Bajude.

¹⁵² Joale u itse, “Basamaria ba ne ba lebeletse ho tla ha Hae.” E, ba ne ba lebeletse, empa e seng Balichaba. Basamaria feela.

¹⁵³ ’Me khetlong la pele ha A ne a kopana le Basamaria, O ne a loketse ho feta le Samaria. Eaba O a ema, ’me A roma barutuoa ba Hae, ho ea batla lijo, ekaba hora ea leshome le metso e ’Meli. A lula fats’e selibeng. Eaba ho tsoela mosali teng, a qalella . . . Joale, rea mo tseba, naheng ena, ke mosali ea mekhoa e lits’ila, mofumahali oa seterata, le a tseba, seotsoa. ’Me ha ho le joalo a tsoa ’Me a qalella ho theolela nkho ka selibeng, ho kha metsana. Eaba o utloa Lentsoe le reng, “Mosali, Mphe metsi.” Eaba o a qamaka ’Me keha Mojude oa lilemo tse ka bang bohareng a lutse mono.

¹⁵⁴ A le mashome a mararo le ho hong feela, empa Bibele e boletse e ne e ka O mashome a mahlano. Ba re, “U monna oa lilemo tse sa tloleng mashome a mahlano, ’me U bolela ha u ‘bone Abrahama?’”

¹⁵⁵ A re, “Pele Abrahama a e-ba teng, Ke teng.” Le a bona? A shebahala a holile ka baka la mosebetsi oa Hae, ’mele oa Hae oa motho.

¹⁵⁶ Eaba o a qamaka. A tseba hore E ne e le Mojude. A re, “Monghali, ha se ts’oanelo ho lona Bajude ho kopa rona Basamaria lintho tse kang tseo. Re arohane.”

¹⁵⁷ A re, “Mosali, ha o no o tsebile eo o buileng le Eena, u no u tla qela metsi ho ‘Na. ’Me Ke ne ke tla u tlisetsa, ho u fa metsi ao u ne u sa tla kha mona.” O ne A etsa’ng? A hokahana le moea oa hae. Le a bona? Elelloang, O tli’o Iponahatsa ho Basamaria, joale.

¹⁵⁸ Eaba o re, “Khele, U re, ‘Ho rapeloe Jerusalema.’ Rona re re, ‘Thabeng ena.’”

¹⁵⁹ A re, “Nako e a tla, le joale e se e fihlile, mohla le sa tlo hlola, le rapela Molimo, thabeng ena kapa Jerusalema, empa ka Moea le ‘Nete. Ntate o batla ba joalo.’”

¹⁶⁰ O ne a etsa’ng? A hokana le moea oa hae. Ka mora nakoana, hoba A fumane moo bothata ba hae bo ne bo le teng . . . Ke ba bakae ba tsebang bothata ba hae e ne e le bofe? O ne a e-na le banna ba bahlano, a bile a phela le oa bots’elela. Ka baka leo, A re, “Mosali, ea lata monna oa hao le tle koano.”

A re, “Ha ke na monna.”

¹⁶¹ Ho re, “Ke ‘nete. U na le . . . u bile le ba bahlano, ’me le eo u lulang le ‘ena joale ha se oa hao.”

¹⁶² A ema a Mo sheba. Joale, ha a ka a re, "U Belsebule, monghali. U senohe-ramahlohonolo." A tseba ka Molimo ho feta halofo ea bareri ba Jeffersonville, ke hantle, e le seotsoa. A re, "Monghali, kea lemoha hobane U moporofeta."

¹⁶³ Hlokomelang, "moporofeta." Mme ha le ka kgutlela morao ka lentsoe leo, le tla le fumana, Moporofeta eo Moshe a itseng o tla tla, le a bona, "Morena, Molimo oa lona, o tla hlahisa Moporofeta ea joale ka 'na."

¹⁶⁴ A re, "Kea lemoha hobane U moporofeta." A tseba ha A sa ka a tseba taba eo ka mokhoa o mong o sele; a ke ke a e tseba. Ho re, "Kea lemoha U moporofeta." Joale mamelang mona, "Rona, Basamaria," e seng Bajude joale. Basamaria, "Rea tseba, Messia mohla a tlang, O tla re bolella lintho tsena." Le bona mofuta oa ponts'o eo ba neng ba e lebeletse? Ponts'o ea Messia. "Messia mohla A tlang, O tla re bolella lintho tsena, empa Uena u mang?"

A re, "Ke 'Na, ea buang le uena."

¹⁶⁵ Eaba o lahla nkho ea hae ea metsi, a matha a kena motseng, a re, "Tloong, le bone Monna ea mpoleletseng lintho tseo ke li entseng. Na enoa ha se Messia na?"

¹⁶⁶ Haeba e ne e le ponts'o ea Messia mohl Lang oo, eka khona ebe ponts'o ea Messia kajeno. Haeba A...Joale, hopolang, le ka mohla mohlolo oo ha o e-so etsoe pel'a Molichaba. Ho no ho thibetsoe. Hobane'ng? Balichaba ba ne ba e-na le lilemo tse likete tse peli tsa thutabokereke.

¹⁶⁷ Empa joale bofelo ba nako ea Balichaba bo fihlile mona. 'Me Russia, makomonisi, a na le bomo e se supileng, ho se felisa, le sona. Le se ts'oenyeh, e tseleng. Bibele e boletse joalo. E tla fihla mona lebitso la hao le ngotsoe holim'a eona, 'me se tla fetoha phofshoana ka nako ea motsotsoana, sechaba sohle. Se tla timeletsoa ka botlalo. Lemohang, ke Molimo o etsang hoo. Kea ba tseba ke *mmuso o itaolang*, ke sekhakhatha sa bahetene. Empa na Molimo ha oa ka oa hlahisa sechaba sa bahetene ho otlolla Iseraеле mehleng e fetileng? Bibele e bolela ha Russia le bokomonisi li bapalla liatleng tsa Molimo hantle, ho felisa batho lefats'eng ruri.

¹⁶⁸ Empa le pele hoo ho ka etsahala, Hloibilo e-ea fihla 'Me e ise Kereke Hae pele hoo ho etsahala. 'Me haeba ntho eo e le haufi hakaalo, Tlhoibilo e haufi hakakang? E atametse ho feta moo. Ka baka leo le bona lebaka leo re...lebaka leo ke rerang kamoo ke rerang, ke sa ntse ke loana ka thata kamoo nka khonang; nakong eo Molimo a sa ntse a etsa seo A ka se khonang, ho susumetsa hoo ka hare ho Bakhethoa, ho hulela peo ea mosali eo ka ntle, e le hore kahlolo e tle e oe le holim'a peo ea noha. Ke hantle haholo. Ke seo A ts'episitseng ho se etsa.

¹⁶⁹ Joale, haeba Jesu a Itlhalositse pel'a Mojude le Mosamaria, ka liponts'o tseo, 'me a re lumelle ho feta re sa hlahisetsoa ponts'o eo e ts'oanang, ha A loka; haeba A re lumella ho E feta feela, ho feta ho thoe, "Re Methodist. Re Baptist. Re Katholike. Re Presbeterian." Che, monghali. A re lumella ho feta ka thutabomolimo e batang.

¹⁷⁰ O loketse ho tla ka liponts'o, meeka, joale ka ha A sebelitse khetlo la pele, haeba E le 'ena maobane, kajeno, le kamehla. Re fihlile tsatsing leo. Re fihlile mona joale. Ka Bibele, ka bopaki, ka Moea, ka mahlale, ntho ka 'ngoe e paka hore e se e le teng mona. Oh, Ke... Oh, eka nka be ke e-na le matla a ho hatella ntho eo bathong, ba tle ba e bone.

¹⁷¹ Lona batho ba mona Jeffersonville le batho ba ka. Ke hotse le lona. Ebile ke-ke a le rata. Le se—le se nkuke ke le lehlanya. Le nahana hore likakanyo tsena li joalo? Shebang morao moroallong oa '37, lona batho, mohla le ne le ts'eha hantle mona kerekeng. 'Me ke re, "O tla ba maoto a mashome a mabeli a metso e 'Meli holim'a Spring Street," likhoeli tse ts'eletseng pele o hлаha. Mpolelleng mohla ntho e kileng ea boleloa, e le HO RIALO MORENA, eo e ne e se 'Nete hantle. Mpolelleng ntho e le 'ngoe A kileng a e bua. Le ka mohla! Ke 'Nete, 'me E sa lutse e le 'Nete, 'me E tlabesale e le 'Nete kamehla.

¹⁷² Joale re ke ke ra tlisa... Kea kholoa ho tla rapelloa bathoy ba lekholo kapa ho feta mona. Re ke ke ra ba tlisa hang bohle. Re tla tlisa bao re ka ba khonang, ka nako, 'me re ba tlise joalo ho fihlela re fihlisitse bohle mona. Joale ke tla qala ka... Kea kholoa. Na Billy Paul o n'a se teng mona? Na o teng morao ka mono? Molelleng ho tla koano mona. Ke batla ho bona seo, na o nts'itse... O nts'itse setlankana sa ho rapella sa eng? [Moena Billy Paul o re, "Q, 'ngoe ho fihla ho lekholo."—Mong.] Bo-Q, Q, Q. Setlankana sa ho rapella sa Q. Sheba setlankana sa hao sa thapelo. Se na le Q. 'Ngoe ho fihla ho lekholo. Ho lokile. Re ka se khone ho ba tlisa bohle hang, empa re ka tlisa ha nyenyane ka nako, ho fihlela re ba fihlisa mona bohle. Re batla bohle ba tle, ka bonngoe ka bonngoe, ba be ba rapeloe kaofela.

¹⁷³ Joale bonang. Ke batla hore motho e mong le e mong, ka hare le ka ntle, ho nahana sena. 'Me ho koaloeng ha kopano ena, ke nehela kereke ena ho molisa, Moena Neville, ho le nehela ho 'ena, le 'ena ho Molimo. Moena Neville mona. Ke rata ho le mema bohle ho khutla. Moena Neville ke lesole le khabane. Ke mohlanka oa sebele oa Kreste. Moreri oa mehleng oa Methodist, kea kholoa, moithuti ea tsoang Asbury, 'me o koetliselitsoe thutabomolimo eohle, kolesheng ea thutabomolimo, o na le boiphihlelo ba seo ba se rutang. Empa, ka tsatsi le leng, a fihla moo a tsebileng hore o loketse ho fumana ntho e fapaneng, eaba o ts'ela mola. Ke molisa mona, monna ea tletseng Moea, moreri oa sebele, moithuti oa sebele

oa thutabomolimo. 'Me kea le kopa, lona batho ba motse 'ona, le sechabeng sena, ha u se na kereke, 'me u batla ho utloa Evangelii ea makoma, tloo mamele Moena Neville. O emetse eona Ntho eo ke e emelang. Ruri, lesole la sebele le khabane. Rona bohole, mona, re rata Moena Neville. O qetile nako e ngata le rona mona, 'me re a mo rata.

¹⁷⁴ Joale ha Jesu Kreste, ka Moea, a ka khuttlela mona bosiung bona 'Me a etsa lintho tse ts'oanang le tseo A li entseng mohla A na a le lefats'eng mona, ho Bajude le Basamaria, O tla etsetsa lona Balichaba ntho e ts'oanang, ke ba bakae ba lona ba ka reng, "Ke tla Mo lumela ka pelo eohle ea ka 'Me ke tla e amohela hona mona"? Ho sa tsotellehe kereke eo u e kenang. Ha ho na....

¹⁷⁵ U ka re, "Na u batla ke tlohele ho ea kerekeng ea Methodist?" Che, monghali. "Baptist?" Che, monghali.

¹⁷⁶ E-ea hohle moo u batlang, hoba Molimo o na le bana kahara e 'ngoe le e 'ngoe ea likereke tseo. Ruri, O na le bona. 'Me uena, mohlomong, u e mong oa bona. 'Me ke u rata joale ka ha u no u le setho sa Tabernakele ea Branham. Ha ho etse phapang e nyenyane ho 'na. Le tseba seo ka ts'ebeletso ea ka ea lentsoe, hohle. Kea lumela Molimo o rata bana ba Hae, ho sa tsotellehe letso'ao leo ba nang le lona. Ke seo u leng sona ka har'a pelo ea hao. Empa re le memela kopano ea boena feela. Le amohetsoe ho tla.

¹⁷⁷ Joale, motho e mong le e mong o a tseba, le lona batho ba Jeffersonville le a tseba, ka mora lintho tsohle tse ngata tse boletseng le tse entsoeng, 'me tsa leptjoa e sa le pele, e 'ngoe le e 'ngoe ea hlaha ka phethahalo kamoo....Ke ba bakae mona Jeffersonville ba tsebang hoo e le 'nete? Phahamisang matsoho a lona, ba tsebang tikolohong ena mona hona joale. Joale, ho lona batho ba ka ntle ho motse, le bona seo ke se bolelang? Ke batho ba bakae ma-tsoa-ntle ho-motse a kileng a etela likopano tsa ka 'Me ba bone hore e ile ea hlaha hantle ka ho phethahala kamoo E boletseng? Phahamisang matsoho a lona, ho batho ba Jeffersonville. Le a bona? Bibele e boletse, "Taba e ke e tiee ka molomo oa lipaki tse peli kapa tse tharo." E potile lefats'eng lohle. Joale ebe re emetse'ng? Ntho e 'ngoe le e 'ngoe e beiloe matsohong a rona, ke Morena Jesu. "O re neile lintho tsohle feela."

¹⁷⁸ Joale re tla qala mola oa thapelo. 'Me ha Jesu a ka sebetsa mona bosiung bona....

¹⁷⁹ Joale, ke ba bakae ba lona ba tsebang sets'oants'o sa Morena Jesu, Leseli leo? Lona bohole le tseba tsa Lona, mohlomong. Se Washington, D.C., se nkiloe ke monna ea khabane ka ho fetisia eo Edgar Hoover a kileng a ba le 'ena lilemong tse 'Maloa tse fetileng, George J. Lacy, litokomaneng tsa likhatiso tsa menoana. Re na le lebitso la hae—la hae

holim'a pampiri eo. Hore, bonnate . . . O boletse ha le 'ena a kile a hopola e ne e le saekholoji, ke ne ke bala kelello ea batho. A re, "Empa, Mongh. Branham, leihlo la mochini la khamera le ka sitoa ho nka saekholoji." Ho re, "Leseli le otile lense." Ebile re e ngoletsoe eohle pampiring, e tsamaea le sets'oants'o seo, Leseli le otile lense.

¹⁸⁰ Ke ba bakae ba sa ntseng ba phela, ho tloha mohla Le ne le hlahla khetlo la pele ponts'eng ea batho tlase mona nokeng, mohla ke kolobetsang makholo ao tlase mono tsatsing leo? Ka hara mohaho, phahamisa letsoho la hao. Ho na le matsoho a mararo kapa a mane, ba sa ntse ba phela, ho tloha lilemong tse fetileng, mohla Le ne le lepella tlase mona nokeng, 'me Molaetsa oa Morena oa latela. Ho sa ntse ho ts'oana! Na O entse hantle kamoo A boletseng kateng mono? Hore, ts'ebeletso ea lentsoe eo ke tla be ke e rera, e tla qala tsoseletso e eang ka lefats'e, pejana feela ho ho Khutla ha Kreste labobel. Shebang seo E se entseng. Le a bona? Mono ho tsoile, teng mono, Oral Roberts le ba bang bana bohole. Le a bona? 'Me e haotse lefats'eng lohle, sechabeng se seng le se seng, bathong ba bang le ba bang, puong e 'ngoe le e 'ngoe. Mello ea tsoseletso ea tuka, lits'ebeletso tse kholo tsa pholiso. Le a bona?

¹⁸¹ Joale, itokiseng. Ka hare, ka ntle, hohle moo le leng teng, amohelang Kreste. Le tla etsa joalo, bosiusg boo?

¹⁸² Joale, ho qala joale, ke ipea ho Morena Jesu, ke tle ke khone ho ineela Moeeng, e le ho holisa Jesu Kreste feela; e seng 'na, empa Jesu Kreste; hore batho bana, batho beso, metsoalle ea ka, ka hare le ka ntle ho motse, ba tle ba tsebe hore Evangeli eo ke e boletseng ke . . . ke 'Nete e tiileng. 'Me Kreste o teng mona ho E netefatsa e le 'Nete, ka Lentsoe la Hae le Moea oa Hae.

¹⁸³ Re tla lokela ho ba bitsa ka bonngoe ka bonngoe feela. Re tle re be le . . . Re tla qala ka palo ea 'ngoe, Q palo ea 'ngoe. Ke mang ea e ts'oereng? Haeba—haeba u sa khone ho ema joale, baholo ba tla u jara. Re batla ho fihlela e mong le e mong oa lona. Q palo ea 'ngoe. Moena Hickerson, Billy Paul . . . Kapa, be butle, o tla thusoa ke Doc mona. Q palo ea 'ngoe, u ka phahamisa letsoho la hao, motho ea e ts'oereng. Na u tiile e ne e le Q? Kapa, che, oho, ke masoabi. Ke hantle. Nyoloha hantle. 'Monts'eng tsela, mo fetiseng pakeng tsa litulo mono. Q palo ea 'ngoe. Ke hantle.

¹⁸⁴ Palo ea bobeli, phahamisa letsoho la hao, hle. Ke hantle, mofumahali ea lutseng mots'eo-ts'eo *mona*. Ke hantle, mofumahali, tloo. Tsoela koano *mona*; ha le ka mo lumella. Bashanyana ba tla u thusa mono, diashara le ba joalo. Q palo ea tharo, phahamisa letsoho la hao. Palo ea tharo. Na u phahamisa letsoho la hao, motho ea ts'oereng Q palo ea tharo. Shebang hore na mofumahali ea tsamaeang mona, hore o

ts'oere setlankana na. Ha u—u na sona? [Khaitseli o re, “Moena Branham, ke kopile setlankana. Empa ke bone motsoalle oa ka, a eme ka moshanyana ea kulang.”—Mong.] U—u ke ke ua etsa joalo. [“Nke ke?”] Che. U loketse ho se fumana ‘Me u mamele litaelo. Re tla nka lesea, leha ho le joalo. U a bona? U ka tla ha feela palo ea hao e bitsitsoe. Lesea le ka tla ha le bitsoa. Le a bona? Ho itoketse.

¹⁸⁵ Palo ea ‘ngoe, peli. Ke mang ea ts’oereng palo ea boraro? Phahamisa letsoho la hao. Palo ea boraro. Palo ea bone.

¹⁸⁶ Joale, u entse hantle haholo, khaitseli, e leng ho-re e ne e le mang, mosali ea n'a batla ho etsa hoo. Le a bona? Empa, le a bona, ha—ha lipalo tsa bona li bitsitsoe, ba tla tla feela... Ha ba sa bitsoa, re tla fihla ho bona, leha ho le joalo. Le a bona? Re le batla le lutse libakeng tsa lona feela, le tle le fumane sebaka sa lona, le lona, le a bona. Le a bona? Ke hantle.

¹⁸⁷ Palo ea tharo. Palo ea ‘ne. Palo ea hlano. Q palo ea hlano, phahamisa... Morao koana, mosali e mocha. Palo ea ts’elela. Ke hantle, mohlankanya. Palo ea supa. Monna ea mona hantle. Palo ea robeli.

¹⁸⁸ Re loketse ho etsa taba ena. Le a bona, u ke ke ua khona; le hatellana holimo feela, le ka re, “Motho e mong le e mong o batla ho rapelloa.”

¹⁸⁹ E re ke le bonts'e ntho e ‘ngoe, ha le batla ho bona lebaka leo re ts'oanelang ho ba emisa moleng. Motha e mong le e mong ka mona ea ratang ho nyoloha le ho tla rapelloa, ba phahamise matsoho a bona, motho e mong le e mong, ho sa tsotelehe u mang. Shebang mono. Ke mang ya tla tla pele? Le a bona? Eka khona ho be le motho e mong.

¹⁹⁰ Billy o ee a theohele mona, a nke litlankana tsena, ebe o li lobokanya ponts'eng ea lona, ‘me a fe motho e mong le e mong setlankana sa ho rapelloa ea se batlang. U ka fumana hlano, ts’elela, ‘me ka linako tse ling re qala ngeng e ‘ngoe. ‘Me ha ho etse phapang ea letho moo re...’Me ebile ba lets'oeleng ba fola pele ho bana ba kalaneng, ka nako tse ling. Ke ba bakae ba tsebang hoo, le baeti hape... Che, ehlide, ha e amane le eona ka letho.

¹⁹¹ Palo ea ts’elela, na eo e tlide? Palo ea supa. Palo ea robeli. Ke mang ea ts’oereng setlankana sa ho rapelloa sa palo ea robeli? Re se re e fumane? Palo ea robong.

¹⁹² Robeli, palo ea robeli, re batla hore u e fumane joale. Mohlomong ke motho ea ka ntle. Ha e le bona, motho e mong a phahamise letsoho la hae, kapa ntho e ‘ngoe, motho ea ka ntle, ea sa khonang ho kena kahare. Palo ea robeli. Moena Collins, ho na le motho morao mono, setlankana sa ho rapelloa sa palo ea robeli, ea lekang ho kena? Ho lokile, setlankana sa ho rapelloa sa palo ea robeli. Ho lokile.

¹⁹³ Palo ea robong. Setlankana sa ho rapelloa sa palo ea robong, phahamisa letsoho la hao. Mohlomong ba tsoile, ha ba khona ho kena. Ha ba kena, ba kenyeng moleng.

¹⁹⁴ Palo ea leshome, phahamisa letsoho la hao. Monna ea mots'eo morao koana. Tloo, monghali. Ke thabo ho u bona u bitsoa. U no ueme morao mono, litho li honyela. Palo ea leshome.

¹⁹⁵ Palo ea leshome le motso. Phahamisa letsoho la hao, motho ea ts'oereng setlankana sa ho rapelloa sa Q palo ea leshome le motso. Ho lokile, leshome le motso o le mong.

Leshome le metso e 'Meli, Q palo ea leshome le metso e 'Meli. Koana... Ho lokile, leshome le metso e 'Meli.

¹⁹⁶ Leshome le metso e meraro. Leshome le metso e meraro. Phahamisa letsoho la hao feela, hle, ke tle ke bone. Setlankana sa ho rapelloa sa palo ea leshome le metso e meraro, Q leshome le metso e meraro. Leshome le metso e mene. Leshome le metso e mene. Leshome le metso e mehlano. O nts'itse litlankana tse kae tsa ho rapelloa, Billy, lekholo? Leshome le metso e meraro, leshome le metso e mene, le leshome le metso e mehlano ha li eo. Setlankana sa ho rapelloa sa leshome le metso e meraro, leshome le metso e mene, le leshome le metso e mehlano, na le teng moo? Leshome le metso e mehlano, leshome le metso e ts'eleta, leshome le metso e supileng, leshome le metso e robeli, leshome le metso e robong, mashome a mabeli.

¹⁹⁷ Q pele, e ntano ba J, le ho theoha joalo ka mola. Ke nahana ba leka ho fetisa bana, pele, le a bona. Ha re qetile ho bitsa eo, re tla kena ho tse ling ha re ntse re e-tla. Le reng? [Moena o a bua—Mong.] Ke eona. Le a bona, re nts'itse litlankana, hoseng hona, mme batho ha ba ka ba khutla, mohlomong. Le a bona? Ho lokile.

¹⁹⁸ A re qaleng ka bongatanyana boo. Ho joang... Le batla le qetile ka mola oa lona mono joale? Ho lokile. Joale, ke mang ea ts'oereng leshome le metso e mehlano, leshome le metso e ts'eleta, leshome le metso e supileng, leshome le metso e robeli, leshome le metso e robong, le mashome a mabeli, ho bo-Q? Mashome a mabeli le motso, mashome a mabeli le metso e 'Meli, mashome a mabeli le metso e meraro, mashome a mabeli le metso e mene, mashome a mabeli le metso e mehlano. Joale e itokiseng feela, hang hoba ona o fele. Re na le mola o tletseng mona joale. 'Me re tla tla ho bona hantle, ho theoha ka mola hantle, re ntano qhomela litlankaneng tse ling hantle, bo-J, moo re khaotseng teng, le ho theoha hantle ho fihlela re fihla re ba qeta.

¹⁹⁹ Joale bang le hlompho metsotso e 'Maloa. Joale, eka re ka be re e-na le sebaka sa ho lula. Eka nka be ke na le mokhoa oa ho etsa joalo, empa ha re na sona. Empa, joale, ke batla le be le hlompho hakaalo feela. Joale, nako e sa le teng. Ke metsotso e

leshome pele ho robong. Ts'ebeletso e tla be a tsoile, halofong e latelang ea hora. Ka hona, mona ke ho koaleng ha ts'ebeletso, 'me ka hona le be le hlompho e tiileng. Khutsang ruri. Le se ke la phethesela.

²⁰⁰ 'Me ba se nang setlankana sa ho rapelloa ba bakae ka mona, 'me leha ho le joalo le batla ho rapelloa? Phahamisa letsoho la hao. Che, ba hohle feela. Joale, ha u se na setlankana sa ho rapelloa, ke batla ho u fa Lengolo le itseng.

²⁰¹ Ka nako e 'ngoe Morena oa rona o na il'o tsosa ngoanana e monyenyane, ea shoeleng, a e-so shoe lekhatheng leo, morali oa Zakea. 'Me mosali a re pelong ea hae, "Kea lumela ke Monna ea halalelang. Kea lumela Eo ke Messiah." A bile le phallo ea mali ka lilemo tse ngata. Eaba o tsoelipana lets'oeleng 'Me a ama seaparo sa Hae. Le kile la bala pale eo?

Eaba Jesu oa ema, o re, "Ke mang ea Nkamileng?"

²⁰² 'Me Petrose a Mo khalema. A re, "Be, bohle ba U ama. 'Me U ka rialo joang, 'Ke mang ea Nkamileng?"

²⁰³ A re, "Ke ile ka fokola. Molemo, matla, a tsoile ho 'Na." Le bona seo e se etsang ho uena, pono? "Ke ile ka fokola. Matla a tsoile ho 'Na."

²⁰⁴ Eaba O reteleha, ho lets'oele, A ba a fumana mosali. A ts'ohile. A nahana hobane o entse phoso. Empa A mo talima, 'me A 'Molella ka phallo ea hae ea mali, eaba o re, "Tumelo ea hao e u pholositse." Ke ba bakae ba tsebang taba eo e le 'Nete? [Phutheho e re, "Amen."—Mong.]

²⁰⁵ Joale, lona baithuti ba Bibele, na Bibele e bua, e re, "Jesu Kreste hona joale ke Moprista e Moholo, Moprista oa rona e Moholo, ea ka angoang ke maikutlo a rona"? Ke ba bakae ba tsebang hoo? [Phutheho e re, "Amen."—Mong.] Che, haeba E le Moprista e Moholo ea ka angoang ke maikutlo a rona hona joale, O ne a tla etsa'ng, haeba E le eena maobane, kajeno, le ka ho sa feleng? O tla lokela ho sebetsa kamoo A sebelitseng mohlang oo. Na ke 'nete? ["Amen."]

²⁰⁶ Che, joale, ha A ka hara 'Mele oa nama joale, hoba o lutse letsohong le letona la Molimo. Empa O nkile mebele ea rona eo A e sebelisang, 'me ke Moea oa Hae o sebetsang ka rona, joale ka ha A boletse. "Ke tla ba le lona, ka ho lona; mesebetsi eo Ke e etsang, le tla e etsa le lona. Le tla etsa le e mengata ho ena, e mengata, hoba Ke ea ho Ntate." O tla re emela. Le a bona? Empa O tla re tlotsa ka Moea oa Hae.

²⁰⁷ Joale, lona ba lets'oeleng mono, le mpe le shebe ka mona. 'Me le se shebe ho 'na joale ka Moena Branham. Le mpe le re, "Morena Jesu, U Moprista e Moholo, 'me U teng ka mohahong ona. 'Me ke batla ho U ama ka maikutlo a ka, ke U bolella, hore ke a kula. 'Me U e pake ho 'na, ho lumella Moena Branham ho reteleha joalo, ka Moea oa Hao, le ho mpolella

joale ka ha O boleletse mosali eo. Ho tla itokela.” Ke phepetsa tumelo ea lona, ka Lebitso la Morena, ho etsa seo. Joale le bone e lokile kapa che. Le kope Molimo seo, ‘me le bone hore e etsoa ka mokhoa oo na. Joale le be le ts’abo e shwetseng.

²⁰⁸ Joale le ka tisa bakuli ba lona. Kapa, na e ne e le monna enoa? Ho lokile. Ntho ea pele moleng, karolong ena ea mola . . .

²⁰⁹ Ho na le batho ba bangata ka mona. Re leka ho thibela batho, batho ba Jeffersonville; re lumella matsoa-ntle-homotse feela, ke bona ba hatellang ho kena. Hobane, mofuteng ona oa mola, haeba batho ba tsoa mona, tikolohong ea Jeffersonville, ba ka re, “Khele, Moena Branham o tseba batho bao. Ehlide, ke eona taba.” Empa, ehlide, ha ba e-so fihle Afrika, le India, le Asia, le Yuropa, le lefats’eng lohle ho pota, libakeng tse ling. Empa ha ke tsebe seo.

²¹⁰ Ke lumela, batho bohole ba moleng ona hona joale, ba shebahala e le melata ho ‘na. Lona bohole na le melata ho ‘na? Phahamisang matsoho a lona feela ha le le eona. Ho lokile. Ke hantle. Ke ba bakae hara lets’ole bao e leng basele ho ‘na, kapa le tseba ke sa tsebe letho le phoso ka lona? Motho mang kapa mang, ho sa tsotelehe ke mang. Ehlide, ha ho joalo, le a bona. Empa Eena o a tseba. Joale, ha ke re O tla etsa joalo. Empa ha A rata, hoo ho Mo etsa ea leng teng mona hantle.

²¹¹ Joale, monna enoa mona, kea kholoa, o ile a phahamisa letsoho la hae, a bolela ha ‘na le ‘ena re sa tsebane. Ha re tsebane. [Moena o re, “Ho joalo.”—Mong.] Ha ke e-so bone monna eo bophelong baka. Ke ile ka . . . [“Ha ke e-so u bone le ‘na.”] Ha a e-so mpone bophelong ba hae ho fihlela hona joale. Re kene ka mohahong, ‘me re bonane khetlo la rona la pele joale.

²¹² Joale, sets’oants’o se phethahetseng sa Filippi ea tlohang ke sena, a lata Nathanaele, ‘me Nathanaele a ema pel’ a Jesu. Joale, ha se hore eena ke Nathanaele kapa ‘na ke Jesu. Joale, u se ke ua nahana joalo. Empa ke lilemong tse ngata hamorao, ka ts’episo e entsoeng mohlang oo. ‘Me banna ba babeli ba eso kopane bophelong ke bana, joalo feela ka banna ba babeli mohlang oo. ‘Me ha Jesu esale Eena, a ka nehela moea oa hae tumelong, ‘me le ‘na nka nehela moea oa ka tumelong, ho Kreste, ka neo e Khethehileng ea Moea o Halalelang, ‘me ho ka etsoa mohloloo o ts’oanang. Na ke ‘nete? [Phutheho e re, “Amen.”—Mong.] ‘Me e phahametse hloleho. U ka re, “Mohlolo ona?” Che, nka tseba hoo joang, athe ha ke eso ‘Mone? Matsoho a ka ke ana. Ha re eso kopane pele. Rona, re eme mona, kgetlo la pele. Molimo o a mo tseba; ‘na ha ke mo tsebe.

²¹³ Joale, le hopole, le nthapelle. Joale ka nako tse ling mona—nakong tsena, Moea o a tlotsa, ‘me esale ho etsoa haholo joale, hoo ekang ho . . . Che, ke—ke batla le lule ka khutso feela. Le be le ts’abo e shwetseng. Hlokamelang. Le lule thapelang.

²¹⁴ Joale, monghali, ke batla uena, ha ke u tsebe, empa u mona ka morero oo ke sa o tsebeng. Empa ekaba eng, 'me Morena Jesu a ka mpolella seo u se batlang ho Eena, uena u sa ka ua mpolella, hoo ho tla Mo etsa seo ke sa tsoa 'Molela A ne a le sona, eena maobane, kajeno, le kamehla. U a e lumela? [Moena eo o re, "Ehlile."—Mong.] Ke hantle. U a e lumela. 'Me joale mokhupi o lumela seo. Le Morena o boletse A tla etsa hoo, ka hara Bibele ea Hae.

²¹⁵ Joale, ke hona moo ke fumanoang ke bolela 'Nete ka Bibele ea Molimo, kapa Bibele e ts'episitse ntho eo E sa khoneng ho e ts'ehetsa, kapa ke moikaketsi; e 'ngoe ea tsona. Le a bona? Ke hantle. O bona sebaka seo o ipeang ho sona. Ke se ke e entse ka pel'a bongata, likete tse ngata tsa batho, baseholli le bohle. Empa kea tseba O a ts'episa, O bile o boloka ts'episo ea Hae.

²¹⁶ Ke E bona e qala mona hona joale. Ke bona batho ba u teetseng hare, likalaneng, le ka ntle ho ts'ebeletso, ha re bee batho ka mathoko. U a bona? Ho na le batho ba kulang mona. Hang feela ha E qala, u ka E utloa. Ke Moea o Halalelang. Ebang le ts'abo e shoetseng joale, ka ts'abo feela joale, joale re sa bua. E, monghali. Morena Jesu o re rata ka bobeli, hoba re banna ba babeli bao A ba shoetseng. 'Me re kopana kgetlo la pele. Haeba o hloka, Molimo o ka aba tlhoko eo, hoba A ts'episitse hore O tla e etsa.

²¹⁷ Empa, joale, monna, ha a ka ts'epahala pelong ea hae, o a hlokomela hore ntho e 'ngoe e a etsahala. O mpa a sa khone ho nahana hantle hore ke eng. Empa Lengeloi leo u le bonang sets'oants'ong, le ntse le atamela monna haufi le haufi, 'me o ntse a 'nyamella a tloha. 'Me monna o khathatsoa ke lefu la pelo, o bile o na le daebetise. Ke hantle. Ke HO RIALO MOEA. Ha e lokile, phahamisa letsoho la hao.

²¹⁸ Joale, haeba ke e-so u bone, nka tseba letho joang ka uena? Ka mokhoa o itseng, ka mokhoa oo A tsebileng mono. Ho lokile? [Moena o re, "Ke hantle."—Mong.] Na lets'oele le lumela seo? [Phutheho e re, "Amen."—Mong.]

²¹⁹ Joale, hobaneng—hobaneng re sa nke nako ea rona feela, nakoana feela, le tle le bone hore e ne e se ntho ea kakanyo feela. A re nkeng ntho e 'ngoe esele, 'me re bone na Moea o Halalelang o ke ke oa re senolela ho hong. A re bueng feela le monna ea emeng mono, motsotso feela. Ho ka ba le ntho e 'ngoe esele bophelong ba hae, mohlomong ntho e phoso ho eena. Ha ke tsebe.

²²⁰ Ha ke tsebe seo ke se buileng ruri. Ke tla lokela ho e bona sehatising mona, hoba, le a bona, ke pono, le bona moo a ne a le teng. E, kea e bona joale. Ke ntho e mabapi le mali a hae. Ke tsoekere. Eya, ke daebetise. U na le lefu la tsoekere, 'me le bile le tsositsese lefu la pelo, le tsositseng pelo e tsetselang. E se e mo ts'oere nakoana. 'Me ha se motho ea tsoang motseng ona. Empa

u tsoa Indiana, sebakeng se pel'a tulo e bitsoang joale ka Borden. U...Ke bona Borden. U tsoa Borden. Ke HO RIALO MORENA. Ke eona.

²²¹ 'Me ho na le ntho e phoso bophelong ba hao.

²²¹ Ntho e 'ngoe ke ena. Ke bona ho hlaha mosali ponong mona, ka hobane o le...Ke mosali oa hao, 'me o hloka phekolo ea mofuta. 'Me o khathatsoa ke ho hohlolha ha mofuta. Ke asma, e mo ts'oereng.

²²² 'Me u na le ntho e phoso bophelong ba hao, eo u lekileng ho e etsa. Ka tumelo, u Mopentekosta, hoba, uena, ho u bona kopanong ea Mapentekosta moo ba hoeletsang ba bile ba opa liatla. 'Me u ntse u leka ho tlolahela...U a tsuba. Ke eona ntho eo u ntse u lekang ho e tela, ho tsuba lisakrete. Ke hantle haholo. Ke HO RIALO MORENA. Ke 'nete. Ha ke re? Ehlide, ke eona. U a bona? U a lumela hore O teng, mona hona joale? Na u itokiselitse ho amohela pholiso ea hao?

A re inamiseng lihlooho tsa rona.

²²³ Morena Molimo, Ea tsotsitseng Jesu Kreste Ea leng teng joale, monna enoa, Morena, ea emeng mona hore mahlohonolo a Molimo a tle a lule holim'a hae, re rapela hore U tle u mo abele takatso ea pelo ea hae, ka Lebitso la Jesu Kreste. Amen.

²²⁴ Khutlela lapeng la hao, u e fihlele e le joale ka ha u lumetse. 'Me ho tla ba joalo. Molimo a u hlohonolofatse.

²²⁵ Le a lumela? [Phutheho e re, "Amen."—Mong.] Molimo o Matlaohle, O ngotseng Bibele ena, Eo Moea oa Hae o leng teng mona, o a tseba ha ke e-so bone monna eo bophelong ba ka, kamoo ke tsebang, ho fihlela motsotsong ona. Empa, ke tseba ntho e le 'ngoe, Moea o Halalelang o teng mona hantle. Ha ke tsebe seo A tla se etsa, empa kea tseba O teng mona.

²²⁶ Na ke mofumahali enoa? Ho lokile. Na re basele e mong ho e mong? Che, u—u—u mpone likopanong, empa ha ke u tsebe. [Khaitseli o re, "Che. Che."—Mong.] Ke hantle. Ho lokile. Joale, u mona ka morero o itseng.

²²⁷ Joale, mohlomong mosali o mona...Ekaba Mokreste; mohlomong ha se 'ena. Ekaba monyefoli. Ha e le eena, le shebe se tla etsahala. Le a bona? 'Me ha ke tsebe lebaka la hae mona.

²²⁸ 'Me oa ka o lutse kae-kae ka mohahong, mosali ea holileng. Le nahana nka leka ho nts'a mothoana eo oa batho kotsi? Le hopola nka tla ho eena joale ka mothetsi? Ruri nke ke ka etsa joalo. Nka mpa ka tloha kalaneng ka ikela hae; ke se ke rerile Molaetsa. Empa ha se phetho se tsamaeang le Molaetsa. Kreste esale eena maobane, kajeno, le ka ho sa feleng. Ho sa tsottelehe seo lefats'e le se buang ka eona. Re loketse ho e emela, leha ho le joalo. Molimo o itse le e etse.

²²⁹ Ha ke u tsebe; 'Me, ehlide, u lutse ka ts'ebeletsong, mohlomong moo ho nang le makholo-kholo a batho, ho ne ho

sa tlo ba le mokhoa oa hore nka u tseba. Empa papiso ea Mohalaleli Johanne 4 ke ena joale, monna le mosali, ba kopana khetlo la pele. Morena oa rona le mosali oa Mosamaria ba kopana hape. Joale ba ile ba qoqa. A hokahana le moea oa hae, ho tseba se neng se le phoso ka eena, a 'Molella, a ba a Mo elelloa e le Messia. Na u tla etsa joalo? U tla etsa.

²³⁰ Na mokhupi o tla etsa eona ntho eo, mosali e mong le mong ka ntle mono? [Phutheho e re, "Amen."—Mong.] Molimo a ke a fane ka eona. E.

²³¹ Mosali o khathatsoa ke—ke maemo a linerefe. Li mo ts'oere nako e telelele, lilemo tse ngata tse fetileng. Ke 'Mona esale mosetsana. Empa ha se ntho e kholo eo a batlang ke e rapelle. Ke athraetisi e mo holofalitseng. Ke seo u batlang ke se rapelle.

Joale le a lumela? [Phutheho e re, "Amen."—Mong.]

²³² A re qoqeng le eena ho feta-feta moo. Moea o Halalelang o ke o abe sena. Hantle-ntle mosali o—o puo ea hae ke e sele. Lebitso la hae ke Hanson. Ke 'nete. Mo-Norwegian kapa mo-Swedish, e 'ngoe. Ha u tsoe motseng ona. U tsoa tulong e bitsoang Canton. 'Me ke naheng e kholo moo ho nang le koro e ngata. 'Me ke Minnesota. Ke hona moo u tsoang teng. Ke 'nete. Joale khutlela hae; u folile. Jesu Kreste o a u phelisa. Bolella batho lintho tse molemo tseo Morena a u etselitseng tsona.

²³³ Kea kholoa re ne re sa tsebane. [Khaitseli o re, "E. Ke etetse likopano, empa ha u ntsebe."—Mong.] Ha ke u tsebe. Che, mofumahali. Empa Morena o a u tseba. U tlide ka morero. Ha ke tsebe. Empa ha Morena Jesu a ka nts'enolela see u tlileng ka sona mona, u tla tseba haeba e le 'nete. Ha nka tla mona ke re, "U a kula, mosali." Ehlide, ueme moleng oa ho rapelloa, hoo ho bonts'a...[Sekheo lebanteng.]

²³⁴ Hlahlolo ea hao e bonts'a o na le phoso sebeteng. O le bitsitse *cirrhosis* [lefū la sebete—Moft]. Ke hantle. Ho bua le eena motsotsotso. Feelā...Na o lumela Morena Jesu, ea buileng le mosali selibeng, esale eena Jesu eo kajeno? [Khaitseli o re, "E."—Mong.] U etsa joalo? Ho na le, moea oa hao eka o a hlaboseha. Ha u tsoe mona. U tsoa bochabela, u tsoa Ohio. Ke hantle. Dayton, Ohio, ho tla koano. ["Ke hantle."] Ke hantle. Ke bona... .

²³⁵ U nts'u rapella motho e mong. Ke moshanyana. U na le lefu la pelo. O na le li-alsa, le eena, moshanyana ea khathatsoang ke linerefe. Ke hantle. 'Me u rapella moea oa hae, hoba a sa bolokeha. Ke HO RIALO MORENA. Ke 'nete. Ha se eona? ["Mora oa ka."] U folile. U ka ikhutlela. 'Molelle, iphe matla. Jesu Kreste... .

²³⁶ Ha ke u tsebe, mofumahali, ha ke u tsebe. Molimo o a u tseba. Ha Molimo o ka mpolella bothata ba hao, u a lumela ke mohlanka oa Hae? Ho Mo netefatsa feelā. U a bona, seo ke batlang ho se etsa ke hore batho bana, ba nyolohang ka mola oa ho rapelloa, ba tle ba bone hore O teng mona.

²³⁷ Ntho e ‘ngoe e etsahetse ka hara ts’ebuletso. Ho na le basali ba babeli ba emeng mono, bobeli, ba roetse ligalase. Motho e mong o Mo amile, ka maikutlo a bona. Ke bone mosali eo feela, seo... Bothata ba tsebe ea hao, bo felile joale. Shebang mofumahali, kamoo a ts’oanang le enoa kateng. Ba ne ba eme mono. Ka ba bona. Empa e mong o ne a etsa *sena*; ‘Me ho ne ho se letho ho *enoa*.

²³⁸ Lebaka la eona ke lena, mosali enoa o emetse motho e mong. Ke hantle. ‘Me mosali eo ke moahelani oa hao. ‘Me o ts’oeroe ke athraetisi. ‘Me uena u eme sebakeng sa hae. ‘Me ke u bona u mo rapella, hoba a sa bolokeha. ‘Me u ntse u mo rapella. Ke ntho e khabane eo. Bea sakatuku seo holim’ a hae, seo u se nkileng letsohong la hao. ‘Molelle ho se belaele, le ho neela bophelo ba hae ho Kreste, ‘me athraetisi ea hae e tla mo lesa.

²³⁹ [Sekheo lebanteng—Mong.]... o llelang, khaitsei? U lumela ho Molimo? U lumela ho ‘na ke le mohlanka oa Hae? U lumela Molimo a ka mpolella ntho eo u e llelang, le seo takatso ea hao e leng sona? Ha u e lumela, phahamisa letsoho la hao. U a lumela ho khaoha ha mothapo ho tla mo lesa? Ha u ka e lumela, e tla fela. Eba le tumelo feela. Feelu u se belaele.

²⁴⁰ U phela joang? Kea kholoa ha re tsebane. Morena Jesu o re tseba babeli ba rona. U mosali ea mocha haholo. Empa ha u o tlela uena mona. Ke bona ho nyoloha sepatala, liphate. ‘Me ke ‘Mao eo u mo rapellang, ‘me o siriloe ke lefu. O khathatsoa ke pululana ea nyooko, mathopa. ‘Me o na le mofets’e, hape, seriti se sets’o sa mofets’e. Nka sakatuku seo, eo u llelang ho eona, u e bee holima hae. ‘Me u bitse Lebitso la Morena, ‘me u se ke ua belaela. Ha u sa belaele, Molimo o tla mo ‘nts’ a teng a mo phelise. U se ke ua belaela joale. E-ea ka Lebitso la Morena, ‘me u lumele.

²⁴¹ Na le kholisehile hore Kreste o a phela? [Phutheho e re, “Amen.”—Mong.]

²⁴² [Moena Branham o a khutsa—Mong.] Ho na le ntho hantle... Oh, ke mosali ea lutseng morao mono, setulong seo. O khathatsoa ke lihlooho tse opang. ‘Me esale a rapela Morena, mono, o leka ho hlokomela ngoana eo. O u utloile, khaitsei. Ho phethehile joale. Ema ka maoto a hao feela, ho rorisa Molimo ka hona, mofumahali. Rorisa Molimo feela ka hona. O a bona?

²⁴³ O amme eng? Ha a nkama. Empa o amme Moprista eo e Moholo. Ha ke tsebe mosali. Ha ke e-so ‘Mone, bophelong ba ka. Empa Molimo o sa tsoa mo folisa. Na hoo ho etsa Jesu eena maobane, kajeno, le ka ho sa feleng? [Phutheho e re, “Amen.”—Mong.] Ehlide, e etsa joalo. Ha le lumela! Tsohle li ka etsetsoa ba lumelang.

²⁴⁴ E holim’ a mokhupi, motho ea rapelang. Le a bona, e its’etlehile moo matla a laolang teng, moo Moea. Nka latela

feela le ho bua feela kamoo A buang; ha ke tsebe. Oh, ke mosali ea roalang ligalase tsa hae, o ntsa lla. Lebaka leo a na nts'a lla, hoba Moea o holim'a hae. Ke oo moo O leng teng. Lefu leo la mala leo u khathalitseng nako e telelele; eba le tumelo, le tla u lesa le se hhole le khutla. Ha ke tsebe mosali eo. Ha ke e-so 'Mone. Ha a nkama le ka mohla. O amme Moprista e Moholo.

Ha le lumela!

²⁴⁵ O holim'a mosali e mong. Ke batla motho mang kapa mang ea batlang, a shebe mona. Shebang mosali ea llang; shebang mosali e mong ea lutseng ka mokhoa o tloaelehileng; shebang mosali e mong ea pel'a hae, ea llang. O ne a ts'oeroe ke lefu la pelo, mofumahali e monyenyane ea lutseng mono hantle, ea nchebileng ka... Eya. Ke hantle. U n'u ts'oeroe ke lefu la pelo. Ha ke re? Le u tlohetse. Tumelo ea hao e hotelitse Molimo, 'me ua Mo ama.

Oh, hona ho a babatseha!

[Moena Branham o khutsa metsotsoana e mashome a mabeli le metso e mehlano—Mong.]

²⁴⁶ Le bona mofumahali eo ea lutseng mono a inamisitse hlooho ea hae, a rapela? Mosali ea hlooho e putsoa, ke osele ho 'na, o lutse mono. E. U ile ua reteleha, ua mo sheba. O khathatsoa ke lefu la pululana ya nyooko. Esale a rapela Molimo ho bo tlosa ho eena. 'Me u n'u rapela lekhatheng leo, "Morena, e re a mpitse." Ke hantle. Ha e le 'nete, phahamisa letsoho la hao. Ke tsebile thapelo ea hao joang? Le u tlohetse. Tumelo ea hao e u pholositse. E-ea hae u fole.

²⁴⁷ Le a lumela na? Ha le lumela, lintho tsohle li ka etsoa. Empa eka khona le lumele.

²⁴⁸ *O sa ntse o tsamaea lebatooeng leo, ho lula mono.* Hantle mona, oa bobeli ho tloha qetellong, khatello e holimo ea mali. Ha u ka lumela ka pelo eohle ea hao, khaitseli, ho felile. U lumela Molimo, ho mo nka Lentsoeng la Hae? Ho lokile. Phahamisa letsoho la hao. Ke seo u n'u se rapella, "Morena a ke a mpitse khetlong le latelang, ka khatello e phahameng ena ea mali." Ke o sele ho uena. Ha e le 'nete, hoehla ka letsoho la hao. Ho lokile. Bo u tlohetse. E-ea hae u phele.

²⁴⁹ Le bona seo e leng sona? Ke tumelo. 'Me ha le ka e lumela! Le a e lumela na? [Phutheho e re, "Amen."—Mong.] Le a bona, batho bao ka ntle mono, ha ba na litlankana tsa ho rapelloa kapa letho. Ana le itokiselitse ho lumela? Ana ke kamoo Morena Jesu a sebelitseng mohla A ne a le lefats'eng?

²⁵⁰ Mona, na enoa—na enoa ke 'ena, monna tloo? Ho lokile. Ha le tsebe hoo ho etsang, ho lona bohle. Ho Tabernakele ea Branham, joale shebang holima letsoho mona. Le a bona? Le a tseba ha nke ke ba joalo. Ke eng? Moea oa Morena. O a tlotsa.

²⁵¹ Batho ba bangata ha ba tsebe seo tlolo e se bolelang. Ba nahana e bolela ho hoeletsa. Ke thabo eo. Matla a tla ka hlokofalo

e halalelang. Le a bona? Eo ke thabo ea Morena. Matla a Morena ke ana; mo folise, mo phelise. Bonang seo A se etselitseng ngoanana e monyenyanane a lutse mono phirimana e 'ngoe, a qhoalile; ho monna oa sefofu; ho ba bang, ho phatlalla hohle.

²⁵² U phela joang, monghali? Ke a kholoa re basele e mong ho e mong. Ha re tsebane. Ha ke u tsebe, le uena ha u ntsebe. Ha e le 'nete, phahamisa letsoho la hao. Ho lokile, kopano ea rona ea pele. Ka ts'abo ea hlompho joale. Monna ke enoa, 'me 'na le eena... o monyenyanane haholo ho 'na, matsoho a rona a phahame, rona bobeli, pel'a Molimo, hore lena ke khetlo la rona la pele re kopana. Jesu o tseba monna eo. 'Me ntho e phoso e ts'oanetse e be e le teng; o eme mono. Ha ke tsebe.

²⁵³ Empa ha ke buile 'nete, eo Molimo a e tiisitseng ka lipaki tse ngata, ke le boleletse 'nete, ho re, "le folisitsoe ka maqeba a Hae." Ke lekhathethe-lefetile. Le ts'oanetse ho fumana tumelo eo e khohlahetseng, ho hloella holim'a lintho tsena.

²⁵⁴ Shebang mofets'e o nyamelang mona phirimananeng ena! Joale le hlokomele feela bopaki bo hlahellang ba oona, liriti tse nts'o tseo tsa lefu. Ngaka ea hao e ratehang e ka leka, sohle seo a se khonneng, ho pholosa bophelo ba hao. Empa ha Molimo o bolela taba, ke phetho. 'Me e ne e se 'na. Ha ho moo ke amanang teng le eona.

²⁵⁵ Joale ho na le makholo a ka bang mabeli mona a lokelang ho rapelloa. Ke batla ho phomola motsotsotso feela joale. 'Me joale re tla qala feela ho rapella batho, ho ba tlisa; e seng ho ba mathisa moleng, empa ho ema mona ho ba rapella. Ke batla ho rapella motho e mong le e mong ea batlang ho rapelloa.

²⁵⁶ Empa hara mokhupi, le bao ba holim'a kalana, ke batla le elelloe hore Jesu Kreste o teng mona. Na le hlokomela seo bohole? [Phutheho e re, "Amen."—Mong.] Motho e mong le e mong o hlokomela seo. ["Amen."]

²⁵⁷ Joale, hore taba ena tle e batalatsoe hoea-ho-ile mohopolong oa lona. 'Na le monna enoa, mona ka matsoho a rona a phahamiselitsoeng ho Molimo, kopano ea rona ea pele. Ha A ka bolela lekunutu la pelo ea hae, joale ka ha A entse ho mosali ea selibeng, kapa ho Filippi, kapa hohle feela ho haola joalo thutong ea Hae, ha A ka etsa seo, na ho tla le tiisetsa lona bohole, hore ke Eena ka botlalo, Morena Jesu? [Phutheho e re, "Amen."—Mong.]

²⁵⁸ E tla etsa joalo ho uena, monghali? [Moena eo o re, "E, monghali."—Mong.] Ha ke na mokhoa, khopolo ea hore bothata ba hao ke bofe. Ha ke tsebe u moetsalibe kapa u Mokreste na. Nke ke ka u bolella. O a tseba; Molimo o a tseba. Empa 'na ha ke khone. Empa ha A ka mpolella... Empa u Mokreste. ["E."] Hobane, hang feela hoba moea oa hao u hokahane le slotso ea Moea ona o holim'a ka, o a O ananelia, ka baka leo kea tseba hobane u Mokreste.

²⁵⁹ 'Me u lutse tlasa seriti se bots'o bo loetseng. Ho na le phoso ka mali. U bile u tsamaile lingaka. 'Me ba batla ho etsa oporeishene, 'me oporeishene eo ke, ke a ba utloa, 'me lingaka tse peli li ntse li eletsana, 'me li batla ho nts'a setho 'Meleng oa hao, se bitsoang *spleen*. Ke hantle. [Moena eo o re, "E."—Mong.]

²⁶⁰ Ebile ha u tsoe motseng ona, empa u tsoa motseng o moholo moo ho nang le thupello e kholo ea bolumeli ba mofuta. Ke Wheaton. 'Me lebitso la hao ke Karl Rhodes, Rhodes, ntho e kang Karl Rhodes. Ho lokile, monghali. Ha u ka lumela pelo ea hao eohle, u ka khutlela ha hao, 'me Molimo o tla baballa bophelo ba hao. U a e lumela na? [Moena o re, "Ke a e lumela."—Mong.]

A re rapeleng.

²⁶¹ Morena Jesu, ke leleka joale bobe bona ho moena oa rona. 'Me ka Lebitso la Jesu Kreste, a ke a phelele tlotsisong ea Molimo. Amen.

Molimo a u hlohonolofatse, moena. Kena leetong la hao, u ntse u nyakaletse!

²⁶² Ke ba bakae ba lumelang ka pelo eohle ea lona? [Phutheho e re, "Amen."—Mong.]

Joale, ke phetho ba tlil'o rapelloa? Ho lokile.

²⁶³ Che, bothata ba hao ba mokokotlo bo u tlohetse u sa lutse mono, ka hona u ka kena leetong la hao, 'me u nyakalle ha u batla. 'Me u ee feela, u ntse u re, "Ho lebohuoe Morena!"

²⁶⁴ E-ea u je sophoro ea hao. Bothata ba hao ba mala bo u tlohetse, ha u ne u kena moleng, ka baka leo u ka ikela ka tsela ea hao, le uena. Lumela feela ka pelo eohle ea hao.

²⁶⁵ Athraetisi ea hao e ke ke ea u hlopha, ha u ka e lumela. Tsoela pele feela, u nyakaletse u rorisa Molimo, ha u rata, moena. Ho lokile. Ho lokile.

²⁶⁶ Le lumela ka pelo tsa lona tsohle? [Phutheho e re, "Amen."—Mong.] Ke ba bakae ba lumelang Molimo? ["Amen."]
Joale ke tla hata mona motsotso feela.



MONNA EA BITSITSOENG SE-MOLIMO SST58-1005E
(God-Called Man)

Molaetsa wona, ka Moena William Marrion Branham, o rerilwe sethatong ka Senyesemane ka Sontaha mantsiboya, Mphalane 5, 1958, mane Tabernakeleng ya Branham mane Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2008 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org